

皇明大政紀

皇明大政紀卷之二

臣豐城雷禮謹輯

餘姚朱錦謹校

金谿閔師孔謹訂

戊申洪武元年正月壬申朔

乙亥

上祀天地於南郊卽皇帝位定有天下之號曰大明建元洪武

自壬戌以來連日雨雪陰沍至正月朔旦雪霽越三日省牲陰雲悉歛日光皎然暨行禮天宇廓清星緯明朗衆皆欣悅

追尊四世考妣爲皇帝皇后。

上皇高祖考尊號曰玄皇帝。廟號德祖。高祖妣曰玄皇后。皇曾祖考尊號曰恒皇帝。廟號懿祖。曾祖妣曰恒皇后。皇祖考尊號曰裕皇帝。廟號熙祖。皇祖妣王氏曰裕皇后。皇考尊號曰淳皇帝。廟號仁祖。皇妣陳氏曰淳皇后。

恭詣社稷壇行禮。

御奉天殿受文武百官朝賀。

冊立妃馬氏爲皇后。世子標爲皇太子。

以李善長徐達爲左右丞相。諸功臣進爵遷秩有差。

丙子。以卽位改元。詔告天下。

封皇族

詔置大廟祭器

上曰。今之不可爲古。猶古之不能爲今。禮順人情。可以義起。所貴斟酌得宜。必有損益。近世泥古。好用古籩豆之屬。以祭其先生。旣不用。死而用之。似亦無謂。孔子曰。事死如事生。事亡如事存。其製宗廟器御。皆如事生之儀。於是造銀器以金塗之。酒壺。孟。觥。每事皆八。朱漆盤。盃。二百四十。及桴。篪。枕。簟。篋。箚。箭。帟。幔。浴室皆具。

興化州耆民李子成率衆降

元守將葉萬戶等聞福州不守遁去。故子成等納款。湯和遣都指揮俞良輔守之。於是莆田等十二縣皆降附。

丁丑。上御奉天殿。大宴羣臣。三品以上者皆陞殿。餘悉列于丹墀。

上諭羣臣曰。朕賴諸將輔相之功。尊居大位。念天下之廣。生民之衆。萬幾方殷。朕中夜寢不安枕。憂懸於心。御史中丞劉基對曰。往者四方未定。勞煩聖慮。今四海一家。宜少紓其憂。上曰。堯舜聖人。處無爲之世。尚猶憂之。矧德匪唐虞。治非雍熙。天下之民。方脫創殘。其得無憂乎。

戊寅。由舊內遷新宮。

庚辰。置寶璽。

初。上欲置璽而未得。有賈浮海適至。聞上卽位。以

玉來獻云。此于闐寶玉也。自其祖父相傳云。當爲帝王傳國之寶。上喜。以示玉工。果良玉。卽命製爲璽一圭一。

辛巳。命廷臣兼東宮官。

初。御史中丞劉基學士陶安言于上曰。適聞中書及都督府議倣元舊制。設中書令。欲奏以太子爲之。上曰。元氏用人。事不師古。設官不以任賢。惟其類是與。名不足副實行。不足服衆。豈可取法。且吾子年未長。學未克。更事未多。所宜尊禮師傅。講習經傳。博通古今。識達機宜。他日軍國重務。皆令故聞。何必倣彼作中書令乎。乃命詹同取東宮官制觀之。謂同等曰。朕今立東宮官。取

廷臣勲德老成者兼其職老成舊人動有典則若新進之賢者亦選擇叅用舉賢任才立國之本崇德尚齒尊賢之道輔導得賢人各盡職故連抱之木必以授大匠萬金之璧不以付拙工同對曰陛下立法垂憲之意實深遠矣於是李善長等兼東宮官詳列卿年表

上欲官外戚后勸止之

上訪得皇后親欲授以官后曰國家官爵當用賢能之士妾家親屬未必有可用之才且聞前世外戚之家多驕淫奢縱不守法度有致覆敗者陛下加恩妾族厚其賜予使得保守足矣若其果賢自當用之若庸下非才而官之必恃寵致敗非妾之所願也上聞后言

遂止

甲申遣周鑄等一百六十四人往浙西覈實田畝。

上諭鑄等曰爾經理第以實聞無踵襲前弊妄有增損曲徇私情以病吾民否則國有常憲各賜衣帽以遣之壬辰克建寧路。

胡廷美督兵攻建寧益急達里麻不能支夜潛至何文輝營納款詰旦總管翟也先不花亦率衆詣文輝營降廷美怒二人不詣已欲屠其城文輝止曰吾與公同受命至此爲安百姓耳今城降欲以私忿殺人可乎廷美遂止乃整軍入申嚴號令毫髮無犯執叅政陳子琦送京師獲將士九千七百九十餘人馬二百七十三疋銀

一萬六千三百餘兩糧九萬八千六百四十石命指揮
費子賢領兵守之廷美卽廷瑞避御宇改今名。

庚子克延平路執陳友定。

先是上遣使招諭友定友定會諸將殺使者置血酒
甕中慷慨飲之誓衆死守至是湯和率師攻之元叅政
文珠海牙等以城降我軍入城見友定飲藥氣未絕繫
送京師以唐鐸知府事友定子海聞父敗以將樂降遣
仁和衛指揮徐與安撫之。

諭天下來朝官。

來朝官陛辭。上諭之曰天下初定百姓財力俱困譬
猶初飛之鳥不可拔其羽新植之木不可搖其根要在

安養自息。惟廉者能約已而利人。貪者必朘人而厚已。況人有才敏者。或尼於私。善柔者。或昧於欲。此皆不廉害之也。爾等當深戒之。

二月壬寅。中書省臣具圓丘方丘宗廟社稷沿革以進。

李善長傅巖陶安等引古酌今。擬冬至祀昊天上帝于圓丘。以大明夜明星大歲。從夏至祀方丘。以五嶽五鎮。四瀛四瀆。從四代各一廟。廟皆南向。以四時孟月祭。及歲除。則合祭于高廟。社稷以春秋二仲月上戊日。上皆從之。

元漳州路總制陳馬兒以城降。

湯和令指揮李執中往守之。

癸卯詔御史大夫湯和還明州造海舟漕運北征軍餉。
命平章廖永忠爲征南將軍叅政朱亮祖爲副將軍由海道取廣東。

元汀州路守將陳國珍以城降。

胡廷美遣降將曹復疇招諭汀州及寧化連城等縣下之於是泉州郡縣相繼降附。

丁未詔以大牢禮先師孔子於國學仍遣使詣曲阜致祭。
戊申上親祭大社大稷。

癸丑克東昌路。

常遇春率兵攻之元平章卞榮自經死於是所屬荏平等縣皆降。

甲寅克寶慶。

平章楊璟遣千戶王廷將兵取寶慶。次邵陽茱萸灘。賊衆千餘拒戰。廷擊敗之。至城下。周文貴遁去。遂下其城。畱兵守之。

丁巳。命都督同知康茂才率師往濟南。從大將軍徐達北伐。

壬戌。勅贛州衛指揮使陸仲副使顧通帥本衛及南雄韶州等衛軍。會征南將軍廖永忠等征廣東。

甲子。樂安俞勝復叛。徐達進師復其城。令指揮華雲龍守之。

乙丑。命中書議役法。

省臣奏議田一頃出丁夫一人不及頃者以別田足之名曰均工夫直隸應天府等一十八府州及江西饒州九江南康等三府計田三十五萬七千二百六十九頃出夫如田之數遇有興作於農隙用之上諭中書省臣曰民力有限而徭役無窮當思節其力毋重困之民力勞困豈能獨安自今凡有興作不獲已者暫借其力至於不急之務淳沉之役宜罷之

戊辰定天子祭祀冕服

上謂學士陶安等曰五冕禮大繁今祭天地宗廟則服衮冕社稷等祭則服通天冠絳紗袍餘不用

庚午命選國子監生侍太子讀書

時選監生周琦王璞張傑等十人入對謹身殿皆姿狀明秀應對詳雅上爲之喜因謂殿中侍御史安慶儒士郭友淵等曰吾觀諸生於文義素習矣然與太子處當端其心術養其德性庶不流於浮靡太子之德亦當有助也因厚賜之

三月丁未命翰林儒臣修女誡

上謂學士朱升等曰治天下者修身爲本正家爲先正家之道始於謹夫婦后妃雖母儀天下然不可以預政事至於嬪嬙之屬不過備職事侍巾櫛若寵之大過則驕恣犯分上下失序觀歷代宮闈政由內出鮮有不爲禍亂者也內嬖惑人甚于鴆毒惟賢明之主能察之於

未。然。其。他。未。有。不。爲。所。惑。者。卿。等。纂。修。女。誠。及。賢。妃。之。事。可。爲。法。者。使。後。世。子。孫。知。所。持。守。

壬申克全州。

楊璟兵圍永州。遣周德興、張彬率兵取全州。元平章阿思蘭率衆遁。民以城降。於是道州莫友遜、寧遠州李文卿、藍山縣黎元師俱請降。

甲戌元左丞何真籍所部廣東郡縣戶口錢糧。遣使奉表迎降。

廖永忠遣人送其使及表詣京師。上謂真保境息民。特召乘傳來朝。

乙酉。蘄州進竹簞。命却之。

上謂未有命而來獻。受之。恐天下聞風爭進奇巧。則勞民傷財。自此始矣。命却之。仍令四方非朝廷所需毋得妄獻。

丙戌。平章楊璟遣兵攻武岡州。元守將曾權以城降。

戊子。命中書省給榜撫安山東郡縣。時徐達奏山東悉平。令所在訪賢才。凡仕元者疑懼不自安。故榜諭之。

丙申。克南陽路。

征西將軍鄧愈率兵下之。擒其守將史國新等二十六人。獲軍士一千五百餘人。馬一百五十匹。

己亥。左君弼竹昌以汴梁降。

守將李克彝因君弼不敢戰夜驅軍民遁入河南於是君弼等率所部降令都督僉事陳德守汴梁。

命禮官及諸儒臣編存心錄

上以祭祀爲國家大事念慮之間儆戒或怠則無以交神明乃命禮官及諸儒臣編集郊祀宗廟山川等儀及歷代帝王祭祀感應祥異可爲鑒戒者爲書以進。

四月辛丑取德慶路。

陸仲亨率兵下英德清遠連江連州肇慶等郡縣進攻德慶元守將張鵬程棄城遁

丁未命畫古孝行及身所經歷艱難起身戰伐之事爲圖示子孫。

上謂侍臣詹同等曰。富貴易驕。艱難易忽。久遠易忘。後世子孫。生長深宮。惟見富貴。習於奢侈。不知祖宗積累之難。故示知之。以此朝夕覽觀。庶有所警也。

戊申。克河南路。

徐達師至河南塔兒灣。元將脫目帖木兒以兵五萬迎戰。列陣於洛水之北十五里。我軍旣成列。副將軍常遇春發一矢斃其前鋒。彼軍奪氣。達揮衆乘之。俘斬無算。脫目帖木兒將敗卒走陝西。達隨進營于河南城北門。脫克彙復走陝西。於是河南行省平章梁王阿魯溫送款軍門。河南平。達命左丞相趙庸守之。指揮任亮招撫嵩州。

廣州龍潭元將盧左永舉衆降將軍廖永忠令指揮胡德守之。

元國子監祭酒孔克堅來朝。

上賜宅一區馬一匹日給米二石。諭之曰。爾祖明先王之道立教經世萬世之君君臣臣父父子子實有賴焉。故爾孔氏高出常人。常人且知求望聖賢之學。况孔子子孫乎。爾宜勉爾族人各務進學。

壬子元嵩州守將李知院迎降。

常遇春率兵下之。因分兵取未附山寨。

乙卯廖永忠擒廣州僞叅政邵宗愚等誅之。

時新會黃彬河源曹文昌汲州廖仁南海麥康祖俱永

忠捕誅之。

丙辰。上諭宦官不得典兵預政。

上謂侍臣曰。吾觀史傳所書。漢唐末世。皆爲宦官敗蠹。不可拯救。未嘗不爲之惋歎。此輩在人主之側。日見親信。小心勤勞。如呂強張承業之徒。豈得無之。但開國成家。小人勿用。聖人之深戒。其在宮禁。止可使之供洒掃。給使令。傳命而已。豈宜預政典兵。漢唐之禍。雖曰宦官之罪。亦人主寵愛之使然。向使宦官者不得典兵。雖欲爲亂。其可得乎。

丁巳。克永州路元守將右丞鄧祖勝自殺。

楊璟圍永州久不下。命胡海洋等各門築壘困之。至是

食盡力窮。祖勝仰藥死。叅政張子賢等猶率衆拒守。百戶夏昇縋城詣璟降。因言勝死狀。夜三鼓。璟督兵四面攻之。胡海洋等踰城入。子賢復率衆巷戰。天明衆潰。子賢與元帥鄧思誠等就執并獲其全城士馬。璟調衡州衛指揮同知丁玉守之。于是夷陽等州皆遣人降。

戊午。元鞏縣孟夏寨守將叅政李成來降。

庚申。元福昌守帥知院張興鈞州守將哈刺魯守許州右丞謝孚。陳州知院楊崇各遣人詣大將軍送款。

辛酉。叅政傅友德分兵取福昌山寨。元右丞潘莽兒降。

副將軍常遇春下汝川。留兵守之。遂徇下郟縣。

壬戌。都督同知馮宗異克陝州。留都督同知康茂才守之。

癸亥置山東行中書省。調江西叅政汪廣洋爲山東叅政。以翰林院學士陶安爲江西叅政。以侍儀范常爲翰林院直學士。

甲子。車駕發京師。幸汴梁。

守方山寨儒官程普魯以其衆詣大將軍徐達降。

丙寅下潼關。

都督同知馮宗異進兵攻潼關。李思齊張思道棄關遁。遂入關。引兵西至華州。元守將皆望風奔潰。仍請達益兵。達遣郭子興將千金旺守之。

五月庚午。大將軍徐達遣指揮王臻帥兵往虢州等處取毛葫蘆山寨。

巳卯。元梧州守將達魯花赤拜住。藤州守將吳壩。各率衆降。
廖永忠。朱亮祖。慰安之。于是潯貴等州郡以次降。

甲申。登封鞏縣雞翎山。并天堂山寨。復叛。大將軍徐達遣
指揮豐諒等率兵討之。

指揮任亮以兵取露豹寨克之。

己丑。叅政傅友德以兵取凌青黑山二寨克之。

庚寅。車駕至汴梁。

辛卯。常遇春。馮宗異至行在。上慰勞之。庚子。徐達至
行在。上勉達率諸將乘時取元都。

辛卯。指揮唐英。曹諒破雞翎寨。獲叛將。送大將軍營。斬之。
甲午。叅政朱亮祖引兵至梧州。容州同知明安普化暨普

寧縣達魯花赤閭買等皆率父老來降。

乙未。指揮任亮克王山等寨。擒其頭目李德。斬之。

丁酉。以江西行省左丞何文輝等守河南。

叅政朱亮祖師次貴州。元鬱林州知州張那海來降。

昌國州蘭秀山盜入象山縣作亂。縣民蔣公直等集鄉民擊破之。

上遣大理卿周禎至縣。賞其功。賜公直與王剛中各銀一百二十兩。

六月壬寅。詔江西行省叅政黃彬鎮袁州。招集諸山寨逋卒。

甲辰。元海南海北道元帥羅福等及海南分府元帥陳乾

富等俱遣使來降。

壬子。大將軍徐達遣指揮任亮守嵩州。

壬戌克靖江路。

先是左丞周德興分兵據靖江險要以絕其聲援。楊璟既克永州。遂引兵抵靖江城下。屯於北關。叅政張彬屯西關。亮祖亦帥師自廣東屯於東門象鼻山下。攻城二旬不下。璟語諸將校曰。彼所恃者西城濠水耳。當先取閘口關。決其堤岸。則破之必矣。諸將曰。諾。明日遣指揮使丘廣引輕兵攻閘口關。殺其守堤兵。決其堤。濠水涸。因築土堤至近與其城接。以通士卒。遂克其北門。月城尋又克其北門水隘。斬獲百人也。先吉尼有懼色。復攻。

其西門不克我軍死者三百餘人相持凡兩閱月攻之益力也先吉尼勢窮感其總制張榮與麾下裴觀以書繫矢射璟營約降期以是夜來會旣二鼓觀縋城出見璟備言城中儲積空虛人無鬪志可立取之狀璟乃給白皮帽百餘俾歸爲識約四鼓從賓賢門入至期璟命指揮使吳與寧等率衆登城而入也先吉尼聞變倉卒走追至城東伏波門執之亮祖德興各以所部兵入城惟彬尚屯兵南關彬始攻城爲守者所詬恚曰城破之日當悉屠之比克城璟懼其縱殺下令曰殺人傷人及剽掠者死彬乃止衆心遂安

甲子陳友定故將金子隆馮谷保等陷將樂殺知縣馮源

主簿蘓兼舍進寇延平。攻四鶴門。指揮羅德聚千戶李申擊却之。

乙丑。賜北征諸將夏衣。

丙寅。建寧指揮沐英擊敗金子隆于沙縣青雲寨。擒谷保斬之。

戊辰。克南寧路。

廖永忠令千戶宋真守城。送元平章咬住等赴京師。

命平章李文忠率兵討金子隆等。

七月己巳。廣西左江太平府土官黃英衍右江田州府土官岑伯顏等遣使齎印章詣平章楊璟營降。

壬午。新寨麻張等叛。征南將軍鄧愈遣安陸指揮吳復等

討平之。

戊子。元平章阿思蘭以象州降。

辛卯。都督同知康茂才兵至河北安邑夏縣皆降。

丙申。車駕發汴梁還京師。以副將軍馮宗異留守。

焦山寨賊首劉士原寇汝州三屯尚唐等處。指揮任亮等率兵討平之。

丁酉。元郴州守將左丞楊以誠詣平章楊璟營降。

帶刀舍人周宗上疏請府州縣開設學校。上嘉納之。南海賊馮簡等作亂。縣人關敏倡義擊賊死之。

上以敏存日未授官而能仗義討賊沒於王事。特贈敦武校尉兵馬指揮司副指揮。表其鄉曰忠義。令有司立

祠歲時祭焉。

閏七月庚子下衛輝。

傅友德薛顯兵至元守將平章龍二棄城走彰德徐達令獲嘉尹胡仲信從鎮撫王處仁守之。

指揮使曹興才攻九疇山寨平之。

辛丑下彰德。

徐達師至龍二復出走陳同知等請軍門降達令左丞楊思祖守之。

下廣平。

徐達師至元平章周昱先棄城遁邯鄲尹都文正率父老來降。

下未徵天下賢才至京授以守令厚賜遣之。

庚戌詔中書省定置禮。

戊午元長蘆守將左金都院遁去大將軍徐達令指揮費子賢成守遂趨青州下之。

辛酉襄陽指揮王成遇督兵攻破光石腦寨擒僞副樞張成等六十一人斬之。

于是葉魯舞陽等縣相繼降附。

廣東何真率其官屬入朝授真江西行省叅政。

平章李文忠率師攻清化寧化諸山寨擒金子隆及餘黨誅之。

癸亥大將軍徐達等率兵大敗元平章俺普達朶兒只進

巴於河西務。

擒知院哈喇孫等三百餘人。獲馬六百匹。船一百艘。糧二千六百石。

乙丑。達令衛吏田中爲通州判官。攝州事。括糧得四千石。

副將軍常遇春擊敗元知院卜顏帖木兒等。擒之。

丙寅。元主及后妃太子。開建德門往北走。

大將軍徐達命都督副使孫興祖督軍修築通州城。

八月己巳。詔以金陵爲南京。大梁爲北京。

庚午。克元都。

徐達師至齊化門。命將填濠登城而進。達登齊化門樓。

執其監國宗室淮王帖木兒不花及大尉中書左丞相
慶童平章迭兒必失朴賽不花右丞相張康伯御史中
丞滿川等戮之併獲宣府鎮南威順諸子六人及玉印
二成宗玉璽一封其府庫及圖籍寶物又封故宮殿門
令指揮張煥以一千餘人守之宮人妃主令其宦寺護
視號令士卒無侵暴人民安堵明日順德守將吉右丞
胡叅政鄭叅政皆自西山來降武德衛軍校獲前樂安
逃將俞勝及南叅政張郎中等達遣指揮鄭捍赴京獻
捷仍命右丞薛顯叅政傅友德平章曹良臣都督副使
顧時將兵偵邏古北諸隘口。

甲戌以張正常爲真人去其天師之號。

大將軍徐達遣人詣東昌令韓政分兵守廣平。

政招降白土等三十六寨。

乙丑潭州通判王禕上疏勸上法天道順人心。上嘉納之。

上命中書省李善長等建六部分理庶務。

先是中書省惟設四部掌錢穀禮儀刑名營造至是以勝毅爲吏部尚書樊魯璞爲侍郎前司農卿楊思義爲戶部尚書少卿劉誠爲侍郎錢用任爲禮部尚書世家寶爲侍郎陳亮爲兵部尚書朱珍爲侍郎周禎爲刑部尚書盛原輔爲侍郎單安仁爲工部尚書張文爲侍郎以後任用各官詳列卿年表不書。

御史中丞劉基致仕。

先是上北巡命基同李善長留守京師。且語基察奸惡以肅輦轂。雖內府之事亦宜糾舉。基數剛嚴。凡中書僚吏有犯卽捕治之。宦者監工匠不肅基啟。皇太子捕寘諸法。宿衛舍人奕基於直舍。基按治之。人皆側足畏基。會中書都事李彬好事。覺彬素附善長。竊弄威福。善長託基緩其獄。基不允。遣人馳奏請誅彬。上可其奏。時大旱。善長等方議禱雨。而誅彬之報適至。善長曰。今欲禱雨可殺人乎。基怒曰。殺李彬。天必雨。遂斬彬。善長銜之。及上還。怨基者多訴於上。上前善長亦言基專恣。語頗切。上皆不聽。會基有妻喪。因請告歸。上

許之。

大將軍徐達遣指揮華雲龍經理故元都。新築城垣。

北取徑直東西北長一千八百九十丈。

放元宮人。

丁丑遣官釋奠于先師孔子。

以後著爲令。

己卯大赦天下。

癸未詔大將軍徐達改飛熊衛爲大興左衛。淮安爲大興右衛。樂安衛爲燕山左衛。濟寧衛爲燕山右衛。青州衛爲永清左衛。徐州五所爲燕山右衛。

上以元都旣克遂命大將軍徐達副將軍常遇春帥師

取山西別留兵三萬人分隸六衛令都督副使孫興祖僉事華雲龍守之

詔御史大夫湯和爲偏將軍與平章楊璟俱從大將軍徐達征山西

戊子大將軍徐達遣右丞薛顯參政傅友德陸聚等將兵略大同

癸巳溫州南溪人董孟怡等聚衆作亂溫州衛指揮僉事吳廣率兵討平之

命中書省黜妄言御史

時有御史上言陶安隱微之過上曰朕素知安安豈有此耶何由知之對曰聞之於道路上曰御史但取

道路之言以毀譽人。以此爲盡職乎。命中書省黜之。

甲午。命副將軍馬宗異從大將軍徐達征山西。

九月。戊戌。大將軍徐達改故元都安貞門爲安定門。建德門爲德勝門。

戊申。都督同知張興祖率師徇永平路。下之。

癸亥。下詔求賢。

乙丑。副將軍常遇春等下保定府。畱指揮李傑守之。

丁卯。下中山。以指揮董傑守之。

十月。戊辰。大將軍徐達遣廣武衛鎮撫劉聚守河間。兼領府事。

己巳。副將軍馬宗異。偏將軍湯和。下懷慶路。以指揮紀

守之。

副將軍常遇春下真定路以指揮王金吾守之。

癸酉取澤州留兵戍守之。

甲戌故元王左丞以衆攻潼關都督僉事郭子興擊敗之。
丁丑取潞州。

馬宗異湯和下之。

戊寅上以元都平頒詔大赦天下。

大將軍徐達遣徐州衛鎮撫程信守雄州又分兵守霸州。
己卯令告反不實者抵罪。

甲子司天監進元所置水晶刻漏命碎之。

其置備極機巧中設二木偶人能按時自擊鉦鼓。上

覽之謂侍臣曰廢萬幾之務而用心於此所謂作無益而害有益也使移此心治天下豈至亡城命左右碎之乙未以梁貞王儀爲太子賓客秦鏞盧德明張昌爲太子諭德

上諭之曰範金礪玉所以成器尊師重傅所以薰德朕命卿等輔導太子必先養其德性使進於高明帝王之道禮樂之教及往古成敗之跡民間稼穡之事朝夕與之論說日聞謹言自無非僻之干積久以化他日爲政自然合道卿等勉之

丁酉命禮官定正旦朝會儀

十一月己亥定天子親祀圜丘方丘宗廟社稷若京師三

皇孔子風雲雷雨聖帝明王忠臣烈士先賢等祀。則遣官
祭祀。郡縣立社稷。有司春秋致祭。庶人祭里社土穀之神。
及祖父母并父母并得祀。竈載諸祀典。餘不當祀。禁止。
遣文原吉詹同魏觀吳輔趙壽等分行天下訪求賢才。
上諭之曰。天生人材。必爲世用。然人之材器有不同。明
銳者質或剽輕。敦厚者性或迂緩。辯給者行或不逮。沉
默者德或有餘。卿等宜加精鑒。

庚子冬至祀 昊天上帝於圜丘。

上御奉先殿。百官行慶成禮。卽日宴羣臣於奉先殿。
辛丑宴東宮官及儒士各賜冠服。

先是 上建大本堂取古今圖籍克其中延四方名儒

教太子諸王分番夜直。選才俊之士克伴讀。上時召之。賜宴賦詩。商確古今。評論文字。無虛日。是日。上命諸儒作鍾山龍蟠賦。置酒懽甚。乃自作詩賦。故有是賜。甲辰。以孔希學襲封衍聖公。希大爲曲阜知縣。世襲。癸丑。大將軍徐達以叅隨王成守趙州。兼領州事。

右丞薛顯敗故元脫脫帖木兒于石州。

乙卯。大將軍徐達令指揮常正宋真定營壘。

癸亥。詔御史中丞劉基入朝。

上欲來春舉行耕籍田。禮命禮官具沿革以進。

議耕籍之田。上躬祀先農。禮畢。躬耕籍田。以仲春擇日。制從之。

甲子。詔定乘輿以下官服之制。

十二月丁卯克太原。

初元主北奔。命擴廓帖木兒復北平。因是率兵出鴈門關。將由保安州。經居庸關以攻北平。達聞之。謂諸將曰。王保保帥師遠出。太原必虛。北平孫都督總六衛之師。足以鎮禦。我與汝等乘其不備。直抵太原。傾其巢穴。則彼進不得戰。退無所依。此兵法所謂批亢擣虛也。若彼還軍救太原。則已爲我牽。進退失利。必成擒矣。諸將皆曰。善。遂引兵徑進。擴廓帖木兒至保安州。聞之。果還軍。其鋒甚銳。副將軍常遇春謀于達曰。我騎兵雖集而步兵未至。未可與戰。莫若遣精兵夜襲其營。其衆可破。主

將可縛也。達然之。會擴廓帖木兒部將豁鼻馬潛遣人約降。且請爲內應。達於是遣兵夜襲其軍。擴廓帖木兒方燃燭坐帳中。使兩童子執書以侍。衆覺變。擾亂。擴廓帖木兒倉卒不知所出。亟納靴未竟。踣一足。踰帳後出。乘驛馬從十八騎遁出。迨旦。豁鼻馬遣其子來報。達等勒兵進營太原城西。豁鼻馬以其將校降。得兵四萬人。馬四萬餘匹。擴廓帖木兒奔大同。遇春以兵追之。至忻州。不及而還。擴廓帖木兒遂走甘肅。

己巳 上諭皇太子諸王戒土木

上退朝還宮。皇太子諸王侍。上指宮中隙地謂之曰。此非不可起亭館臺榭爲游觀之所。今但令內使種蔬。

誠不忍傷民之財勞民力耳。昔商紂崇飾宮室，不恤人民，天下怨之，身死國亡。漢文帝欲作露臺，而惜百金之費，當時民安國富，夫奢儉不同。治亂懸絕，爾等當記吾言，常存儆戒。

庚午，大將軍徐達遣右丞薛顯、叅政傅友德率師擊敗賀宗哲等軍於石州。

以戴復初署霍州，丁玉明署忻州，蔣應宗署崞州，翁子奇守大谷。

辛亥，詔中書省令禮官定官民喪服之制。

御史高原侃言：「京師人民猶習元氏舊俗，凡有喪葬，設宴會親友，作樂娛屍，惟較酒殽厚薄，無哀戚之情，流俗

之壞至此。非所以爲治。且京師天下之本。萬民之所取。則者。一事非禮。則海內之人。轉相視倣。弊可勝言。况途終禮之大者。不可不謹。乞禁止。以厚風俗。上是其言。定師傅賓客朝賀東宮儀。

叅政陸聚率兵攻車子山寨及鳳山成山帖山三寨。降之。甲戌克平陽。

馮宗異西至猗氏。擒故元右丞賈成。進攻平陽。遂擒右丞李茂。下之。

庚辰。叅政陸聚督兵取胡關山寨。克之。

副將軍馮宗異率兵攻絳州。克之。

擒故元右丞田保。徐伯昌。獲將士五百人。

乙酉太常寺奏擬立秋後辰日祀靈星立冬後亥日祀司中司命司人司祿如唐制立壇於城南上從之陽曲皮皮等十寨頭目各以其衆詣大將軍徐達營降俱令復業

丁亥命築壇於雞鳴山致祭功臣胡大海等以文臣沒於王事者叅軍李夢庚郎中王愷都事孫炎等耐祭

己丑頒社稷壇制於天下郡邑

壇設城西左社右稷各方二丈五尺高三尺四寸陞三級祭用春秋二仲月上戊日

庚寅立旗纛廟

壬辰遣符寶郎俱新奉璽書賜高麗國王

遣知府易濟頒詔於安南。

遣使以書諭夏主明昇。

己酉。洪武二年正月丙申朔。

戊戌。封京都及天下城隍之神。

庚子。上御奉天門。召元舊臣問其政事得失。

馬翼對曰。元有天下。寬以得之。亦寬以失之。上曰。以

寬得之。則聞久矣。以寬失之。未之聞也。夫步急則躓。弦

急則絕。民急則亂。居上之道。正當用寬。但云寬則得衆。

不云寬之失也。元季君臣耽於逸樂。循至淪亡。其失在

縱弛。實非寬也。大抵聖王之道。寬而有制。不以廢棄爲

寬。簡而有節。不以慢易爲簡。施之適中。則無弊矣。

辛丑命天下凡祀典神祇有司依時致祭。其不在祀典而嘗有功德於民事蹟昭著雖不致祭其祠宇禁人撤毀。乙巳命立功臣廟於雞鳴山。

丁未享太廟以功臣廖永忠俞通海張得勝桑世傑耿再成胡大海趙得勝配享。

戊申置河間長蘆都轉運鹽使司。

命。中書省議太歲風雲雷雨嶽鎮海瀆山川城隍諸神壇壝祭禮。

定翰林院官制。

承旨正三品。學士從三品。侍講學士正四品。侍讀學士從四品。直學士正五品。其任用各官詳列卿年表。

庚子。遣前國子監祭酒孔克堅祀孔子於闕里。

命都督孫遇儒等十八人祭天下嶽鎮海瀆之神。

詔免北平燕南河東山東河南潼關唐鄧光息等處稅糧。
癸丑。更定大廟時享禮。

春以清明。夏以端午。秋以中元。冬以冬至。

命祀馬祖諸神築壇於後湖。

甲寅。副將軍常遇春帥師征大同。

乙卯。遣使以卽位詔諭日本。占城。爪哇。西洋諸國。

丙辰。叅政傅友德將兵屯朔州。

巳未。製太廟四代。帝后冠服成。

太常議中庸云。設其裳衣。謂先祖遺衣。祭則設之。今禮

可以義起。宜製冠服藏于廟。以象生時所存。遇祭則陳之。上可其奏。

庚申克大同。

常遇春兵至大同。元守將竹真等棄城走。擒知院于陳等八十餘人。獲軍士七千六百餘人。馬一千三百九十餘匹。

右丞薛顯以兵攻潞州桃花寨克之。

壬戌詔改慶遠南丹軍民安撫司。置安撫使同知副使經歷各一員。

癸亥大將軍徐達遣叅政陸聚分兵守井陘故關。

乙丑平章韓政攻彰德蟻尖寨克之。

二月丙寅詔修元史。

詔中書左丞相宣國公李善長爲監修。前起居注宋濂
漳州府通判王禕爲總裁。徵山林遺逸之士汪克寬胡
翰宋禧陶凱陳基趙壘曾魯高啟趙汸張文海徐尊生
黃篋傅忠王錡傅著謝微十六人同爲纂修。開局于天
界寺。取元經世大典諸書以資參考。

戊辰定遣官祭馬祖先。收馬步馬社之禮。

辛未遣顏魯楊載等使占城爪哇日本等國。

乙亥詔立皇陵碑。

命侍讀學士危素撰文。

丁丑上仁祖淳皇帝陵名曰英陵。

從禮部尚書崔亮奏請。

庚辰故元丞相也速侵通州。守將曹良臣以計却之。
壬午。上躬耕籍田于南郊。

先祀先農。以后稷配。上耕畢。三公五推。尚書九卿九
推。各退就位。應天府尹及上元江寧二縣率庶人終畝。
三月乙未。鄜城故元守將副樞施成詣大將軍徐達降。遂
令成守之。

丙申。上以水旱相仍。減膳省愆。

戊戌。翰林學士朱升以年老致仕。詔許之。

庚子。大將軍徐達師至鹿臺。遂入奉元路。改奉元路爲西
安府。

元守將張思道等聞大兵入關。先三日遁去。達率大軍至三陵坡。父老千餘迎降。達遣左丞周凱入城撫諭。以夏德署府事。

辛丑。上與翰林待制秦裕伯論學術。

上曰。爲學之道。志不可滿。量不可狹。意不可矜。志滿則盈。量狹則驕。意矜則小。盈則損。驕則惰。小則陋。故聖人之學。以天爲準。賢人之學。以聖爲則。苟局於小而拘於凡。近則亦豈能克廣其學哉。裕伯對曰。誠如聖言。

壬寅。叅政陸聚攻承天寨。克之。

癸卯。下鳳翔。

李思齊聞。遇春宗異兵至。率所部十萬奔臨洮。獲其部。

將薛平章等以指揮金興旺守之。

戊申。上與學士詹同論文章。

上曰。古人爲文章或以明道德。或以通當世之務。如典謨之言。皆明白易知。無深怪險僻之語。至如諸葛孔明出師表。亦何嘗雕刻爲文。而誠意溢出。至今使人誦之。自然忠義感激。近世文士。不究道德之本。不達當世之務。立辭雖艱深。而意實淺近。即使過相如楊雄。何裨實用。自今翰林爲文。但取通道理明世務者。無事浮藻。

癸亥。置北平廣西二行省。

初。真定等府隸山東。河南廣西隸湖廣。至是各置行省。以盛元輔爲北平叅政。劉惟敬爲廣西叅政。

四月丙寅大將軍徐達會諸將于鳳翔議師所向。

諸將咸以張思道之才不如李思齊。慶陽易於臨洮。欲先由岷州取慶陽。然後從隴攻臨洮。達曰。不然。思道城險而兵悍。未易猝拔。臨洮之地。西通蕃夷。北界河湟。我師取之。其人足以備戰鬪。其土地所產足以供軍儲。今以大軍感之。思齊不西走。胡則束手就降矣。臨洮旣克。則旁郡自下。諸將然之。達乃畱御史大夫湯和守營壘。輜重。令指揮金興旺。余思明等守鳳翔。遂移師趨隴州。戊辰。置陝西山西二行省。

以中書叅政汪廣洋爲陝西叅政。御史中丞楊憲爲山西叅政。

命博士孔克仁等授諸子經。功臣子第亦令入學。

大將軍徐達率師克秦州。以叅隨陳忠署州事。

乙亥。詔中書編祖訓。

詔定封建諸王國邑及官之制。

下鞏昌。

故元守將平章梁子中等聞徐達兵至。出降。達以禮待之。遂以都督郭子興守之。

丁丑。都督副使顧時等兵克蘭州。以指揮韓溫守之。

故元守將李思齊以臨洮降。

思齊見馮宗異兵至。不能支。遂出降。宗異遣人送徐達營。達遣指揮常正等守之。

己卯大將軍徐遼師入安定州以降將陳宗聚署州事令指揮陳壽周用等守之。

乙酉大將軍徐遼兵入靖寧州遂徇下隆德縣。

戊子大倉衛指揮僉事翁德擊擒倭寇九十二人詔陞指揮副使。

遣使持詔諭吐番。

癸巳淮安寧國鎮江楊州台州等府并澤州各獻瑞麥凡十二本。

羣臣皆賀上曰朕爲民王惟思修德致和以契天地之心使三光平寒暑時五穀熟人民育爲國家之瑞不以物爲瑞也昔堯舜之世不見祥瑞何曾損於聖德漢

武帝獲一角獸。產九莖芝。當時皆以爲瑞。乃不能謙抑。自損撫輯民庶。以安區宇。好功生事。卒使國內空虛。民力困竭。後雖追悔。已無及矣。其後神爵甘露之侈。致山崩地震。而漢德於是乎衰。由此觀之。嘉祥無徵。而災異有驗。可不戒哉。

五月甲午。更英靈曰皇陵。立衛以守之。

丁酉。下平涼。

徐達師至蕭關。父老持羊酒來迎。遂分兵收未附山寨。指揮朱明克延安。遂以明守之。

辛丑。故元守將張良臣以慶陽降。

初。張思道在慶陽。聞王師克臨洮。懼。走寧夏。而使其弟

張良臣與平章姚暉守慶陽。思道至寧夏，與金牌張等俱爲擴廓帖木兒所執。大將軍徐達旣下平涼，卽謀取慶陽。令御史大夫湯和遣軍往和州，別遣指揮張煥將騎兵偵邏慶陽。會合部將謝三遣人招良臣。良臣以其兄被執，遂以城降。良臣驍勇善戰，軍中呼爲小平章。壬寅，都督僉事陳德率兵攻里店買的哥保寨，取之。癸卯夏，至祭皇地祇於方丘。

戊申，張良臣復叛，據慶陽。

初，良臣之降也，遣其叅政花某詣大將軍徐達獻軍民數目。又遣其知院李克仁、葛八來獻馬數目。達遣右丞薛顯將騎兵五千人、步兵六千人同克仁等赴慶陽，比

良臣出迎。伏兵道左。佯爲卑下。以示歸降。逮暮時。以兵劫營。我軍不意其叛。爲所衝潰。指揮張煥被執。顯被傷走還。達聞語。諸將曰。上明見萬里外。今日之事。果如前日所謂。良臣之叛。祇取滅亡耳。當與諸公戮力剪之。癸丑。置福建行省。以中書叅政蔡哲爲叅政。

乙卯。追封皇外祖考爲楊王。妣爲楊王夫人。皇外舅爲徐王。外姑爲徐王夫人。並建廟奉祀。

六月丙寅。功臣廟成。

以徐達爲首。次常遇春。次李文忠。次鄧愈。次湯和。次沐英。次胡大海。次馮國用。次趙得勝。次耿再成。次華高。次丁德興。次俞通海。次張德勝。次胡良。次吳禎。次康茂才。

三才圖會卷二
次曹良臣。次吳復。次茅成。次孫興祖。凡二十有一人。于是命死者塑像于廟。仍虛生者之位。叅政胡大海等歿。上念其功。已命塑其像於卞壺。蔣王之廟。以祀。至是復塑像於新廟。

已卯克開平。

遇春文忠率步卒八萬。騎士一萬。自北平往開平。道三河。經鹿兒嶺。過會州。敗故元將江文清兵於錦川。得士馬一千計。次全寧。故元丞相也。速復以兵迎戰。又敗之。也速遁去。進攻大興州。文忠謂遇春日。元兵必走。乃分千餘兵爲八十屯。伏其歸路。虜果夜遁。遇伏大破之。擒其丞相脫火赤。遂率兵道新開嶺。進攻開平。元主先已

北走追奔北數百里。俘其宗王慶生。平章鼎住等。斬之。
凡得將士萬人。車萬輛。馬三萬匹。牛五萬頭。薊北悉平。
辛巳。大將軍徐達督兵攻慶陽。以擒獲張良臣所遣竹苛。
斬之以徇。

苛。張思道理問也。王保保自寧夏遣其來。慶陽旣受圍。
張良臣復遣還寧夏求援。故獲斬之。仍以叅隨王敬祖。
將兵守彭原。

壬午。安南國王陳日烿遣其少中大夫同時等來朝。貢方
物。因請封爵。詔遣翰林侍讀學士張以寧典簿牛諒往。
使其國。封日烿爲安南國王。賜以駝紐金銀印。

丁亥。造大廟金器成。

七月甲午大將軍徐達遣降將李茂等將騎兵千人往隆德秦安等處收捕未附頭目杜伯不花羅左丞相等

乙未詔遣儒士歐陽佑等十二人往北平等處采訪故元元統及至正三十六年事蹟增修元史

己亥征虜將軍常遇春卒於柳川以平章李文忠領其衆戊申廣西右江田州府土官岑伯顏來安府岑漢忠向武州萬世鐵右江太平府黃英衍思明府黃忽都龍州趙帖堅各遣使奉表進馬及方物詔許世襲

辛亥王保保部將韓扎兒陷原州指揮陳壽死之

徐達聞報與都督馮宗異叅政傅友德議以驛馬關當其衝遣右丞徐禮將兵守之又遣指揮葉谷真守彭原

調指揮常正守邠州。宗異復與徐達謀曰。今大軍圍慶陽。張良臣雖困。未能遽下。王保保欲爲良臣聲援。故令扎兒攻原州。欲以救慶陽。請得移軍逼關。以扼原州。彼無所施矣。達然之。宗異遂以其軍西臨驛馬關。去慶陽三十里而軍。是夜扎兒復攻陷臨涇州。丁千戶退保靈臺縣。

八月丙寅。慶陽小元帥降。

初。小元帥與張良臣共守慶陽。及王師攻圍日急。小元帥欲降。爲張良臣所囚。至是城中降者。夜劫小元帥出。詣大將營。達受之。令軍中無言降者。

故元將脫列伯等領兵攻大同。平章李文忠擊敗之。

初文忠奉命合攻慶陽。至太原聞大同受敵。文忠顧謂左丞趙庸等曰。吾與若等受命而來。閫外之事。有利於國者。專之可也。今大同甚急。若候進止。豈不失機。衆皆諾。遂由代出鴈門。至馬邑。適遊騎數千奄至。猝遇我師。與戰。敗之。擒其平章劉帖木兒。進至白楊門。又擒黠虜四大王。時天雨雪。文忠疑有伏兵。乃身引數騎如山。察視之前軍已駐營。去敵五十里。文忠至。遽令遷之。復前至五十里。營於漫地。其地阻水。先遣人由間道達大同城中。使知之。元將脫列伯果悉銳來攻。文忠令將士秣馬蓐食。閉營不出。先以兩營誘敵。督令死戰。自寅至辰。前營報數至。文忠不爲動。頃之度敵饑疲。乃分軍爲左。

右翼身當前鋒奮擊大敗之。生擒脫列伯。降其軍萬餘。獲馬萬匹。輜重甚衆。縛脫列伯詣軍門。文忠令解其縛。與之共食。遂進兵東勝州。至莽哥倉。還先是元主北走屯益里。命脫列伯孔興以重兵攻大同。欲圖恢復。至是脫列伯被擒。孔興走綏德。其部將復斬之來降。元主知事不濟。無復南向矣。

己巳。命吏部定內侍諸司官制。

上諭之曰。朕觀周禮所記。未及百人。後世至踰數千。卒爲後患。今雖未能復古。亦當爲防微之計。古時此輩所治。止於酒漿醢醢司服守祧數事。今朕亦不過以備使令。非別有委任。可斟酌其宜。勿令過多。又顧謂侍臣曰。

此輩自古以來求其善良千百中不一二見。若用以爲耳目。卽耳目蔽矣。以爲心腹。卽心腹病矣。馭之道。但常戒勅。使之畏法。不可使之有功。有功則驕恣。畏法則檢束。則自不敢爲非也。乃定置內史監。奉御六十人。尚寶一人。尚冠七人。尚衣十人。尚佩九人。尚禮八人。尚樂七人。紀事二人。執膳四人。司脯四人。司香四人。涓潔二人。置尚酒。尚醕。尚麵。尚染四局。設正一人。副二人。置御馬御用二司。設正一人。副二人。內府庫設大使一人。副使二人。內倉監設令一人。丞二人。及置東宮典璽典翰典膳典服典樂典乘兵六局。局設局郎一人。丞一人。又置門官。午門東華門西華門玄武門奉天門左右順門。

左右紅門、皇宮門、坤寧門、宮左門、宮右門各設正一人。
東宮門官、春和門、東宮後門、宮左門、宮右門各設門正一人。

癸酉元史成。

丙子，遣符寶郎僕斯齊詔及金印誥文往高麗封王顥爲王。

復慶陽執張良臣父子斬之。

徐達等攻城久困之，良臣數出戰不利，又遣人赴寧夏求援，皆被獲。至是，糧餉乏絕，平章姚暉等皆出降。良臣父子俱投井中。達命指揮朱杲引出斬之，并誅其黨，以陳德守之。

癸未賀宗哲寇鳳翔。指揮金興旺知府周煥等擊走之。
甲申命園丘方丘壇南皆建殿九間。社稷壇北建殿七間。
爲望祭之所。遇風雨則於此望祭。

從禮部尚書崔亮所議。於是靈星壽星司中司命司人
司祿諸神皆爲殿屋。

庚寅命歲終臘亨通祭五祀於廟門外。

詔儒臣修纂禮書。

各省舉儒士徐一夔梁寅劉于周子諒胡行簡劉宗周
董彝蔡琛滕公琰至京。時曾魯以元史方成共奏留之。
因命與諸儒同纂修。

九月己亥賀宗哲掠蘭州。聞王師至遁去。

大將軍徐達御史大夫湯和發平涼還京師以右副將軍
馮宗異總制軍事。

癸卯令四方或有災異無論大小所司卽時飛奏。
詔以臨濠爲中都。

上詔諸老成問以建都之地或言關中險固金城天府
之國或言洛陽天地之中四方朝貢道里適均汴梁亦
宋之舊京又或言北平之宮室完備就之可省民力。
上曰所言皆善惟時有不同耳長安洛陽汴京實周秦
漢魏唐宋所建國但平定之初民未甦息朕若建都于
彼供給力役悉資江南重勞其民若就北平要之官室
不能無更作亦未易也今建業長江天塹龍蟠虎踞江

南形勝之地真足以立國臨濠則前江後淮以險可恃以水可漕朕欲以爲中都何如羣臣皆稱善至是始命有司建置城池宮闕如京師之制焉

壬子定藩王朝貢禮

甲寅初製鐵券

上欲封功臣有言台州民錢允一吳越王鏐之裔家歲唐昭宗所賜鐵券遂取之準其式而損益其制

乙卯吐蕃寇臨洮渭源指揮韋正率兵擣虜營降之

戊午征南將軍廖永忠叅將朱亮祖帥師自廣西還上仰皇太子率百官迎勞于龍灣

比入見上撫慰懽甚命皇太子迨永忠還第

十月壬戌遣湖廣行省平章楊璟諭明昇奉國入覲昇牽於羣議不能決。

甲子甘露降於鍾山。

羣臣稱賀。上曰休咎之徵雖各以類應朕德涼薄烏足以致斯翰林晁稼對曰聖人之德上及太清下及太寧中及萬靈則甘露降。陛下敬恭天地輯和民人故嘉祥顯著起居魏觀曰帝王恩及於物順於人而甘露降。陛下寬租賦減徭役百姓歡豫神應之至以此故也翰林院侍讀學士危素曰王者敬養耆老則甘露降於松柏此陛下尊賢養老之所致也宜告於朝頒示史館以永萬億年無疆之休。上曰卿等援引載籍言

非無徵然。朕存心警惕。惟恐不至。烏敢當此。一或忘鑒。而生驕逸。安知嘉祥不爲災異之兆乎。告諸宗廟。頒之史館。非所以垂示於天下後世也。羣臣皆頓首謝。

庚午。命圖中書左丞相魏國公徐達。開平王常遇春等。攻戰之蹟於雞鳴山。功臣廟。以示不忘。

辛巳。詔天下郡縣皆立學校。

上諭中書省臣曰。學校之教。至元其弊極矣。使先王衣冠禮樂之教。混爲夷狄。上下之間。波頽風靡。故學校之設。名存實亡。况兵變以來。人習於戰鬪。惟知干戈。莫知俎豆。朕恒謂治國之要。教化爲先。教化之道。學校爲本。今京師雖有太學。而天下學校未興。宜令郡縣皆立學。

校禮延師儒教授生徒以講論聖道使人日漸月化以復先王之舊以革汚染之俗此最急務當速行之

上思州蠻賊黃龍關等聚衆寇鬱林命潭州指揮同知丘廣等率兵討之

十一月壬辰征虜大將軍右丞相徐達北征還入見上慰勞之

乙丑冬至祀昊天上帝於圜丘始奉仁祖淳皇帝配十二月壬戌遣翰林院編修羅復仁兵部主事張福齋詔諭安南占城國王各聽命罷兵

丁卯平章李文忠以所俘脫列伯等獻京師上命釋之仍賜冠帶衣服

甲戌遣中書省管勾甘桓會同館副使路景賢封占城國王阿答阿者爲占城國王。

甲申總兵官丘廣等率兵討上思州追及蠻寇於黃龍關斬之。

設河東陝西都轉運鹽使司。

己丑大賞平定中原及南征將士之功。

故元將王保保以兵襲蘭州指揮張文堅守鞏昌指揮于光來援死之。

保保圍城數重文堅守不出戰時鷹揚衛指揮于光守鞏昌將兵來援至蘭州馬蘭灘卒遇保保兵戰敗被執至蘭州城下使喚張將軍出降光大呼曰我不幸被執

公等堅守。徐總兵將大軍至矣。敵怒，批其頰，遂遇害。城中聞光言，守益堅。保保進攻不利，且懼大軍至，乃引去。庚戌，洪武三年正月辛卯朔。

癸巳，上以王保保爲西北邊患，復命右丞相信國公徐達爲征虜大將軍，浙江行省平章李文忠爲左副將軍，都督馮勝爲右副將軍，御史大夫鄧愈爲左副將軍，湯和爲右副將軍，往征沙漠。

上命諸將曰：元主遲留塞外，王保保近以孤軍犯我蘭州，其志欲僥倖尺寸之利，不滅不已。今命卿等出師，當何先？諸將皆曰：保保之寇邊者，以元主之猶在也。若以師直取元主，則保保失勢，可不戰而自降。上曰：王保

保方以兵臨邊。今舍彼而取元王。是忘近而趨遠。失緩急之宜。非計之善。吾意欲分兵二道。一令大將軍自潼關出西安。擣定西。以取王保保。令左副將軍出居庸入沙漠。以追元王。使其彼此自救。不暇應援。況元王遠居沙漠。不意吾師之至。如孤豚之遇猛虎。取之必矣。事有一舉而兩得者。此是也。諸將皆曰善。遂受命而行。以駙馬都尉王恭爲福建行省叅政。

詔文武百官入朝。除從中書省大都督府御史臺指揮使六部尚書侍郎等官。許上殿。其餘文武官五品以下。並列於丹陛左右。違者糾舉。官舉正之。

甲午。各道按察司來朝。

上詔御史臺官併論之曰。風憲之任。本以折奸邪。理冤抑。糾正廢事。肅清紀綱。以正朝廷。而元末臺憲。每假公法挾私憤。以相傾排。今日彼傾此之親戚。明日此陷彼之故舊。殆猶蛇蝎自相毒螫。以致敗亡而後已。如此則何以爲臺諫也。今卿等司風紀。當以大公至正爲心。揚善遏惡。辨別邪正。不可循習故常。挾公以濟私。苟或如此。不惟負朕委任。亦且失其職守矣。

命內外風憲官。與其屬官。依品行禮。

命中書省符下山東行省。召募水工于萊州洋海倉運糧。以餉永平衛。

禮部定朝日夕月禮。

朝日以春分夕月以秋分星辰則祔祭于月壇。

庚子遣使往安南高麗占城祀其國山川仍命各國圖其山川及纂錄其碑碣圖籍付使者還所至諸國皆勒石紀其事。

壬寅諭吏部不宜以有罪被黜官除廣東儋崖等處擇良吏化道之。

丁巳命戶部主事李亨馳驛往賑西安鳳翔二府饑民。

戶給粟壹石計二萬六千八百八十九石。

沂邳二州山民作亂命叅政陸聚討平之。

二月壬戌令羣臣有親老者許歸養。

上行後苑見巢鵲卵翼之勞嘆曰禽勞如是況人母子

之恩乎。遂下令云。

甲子。合祀太歲四季月將風雲雷雨嶽鎮海瀆山川城隍旗纛諸神。

上以各壇專祀時日與品物各不同。遂合祀。凡設壇十有九。太歲四季月將第一。次風雲雷雨。次五嶽。次五鎮。次四海。次四瀆。次京都鍾山。其各省及左江右江安南占城高麗諸國山川并京都城隍旗纛諸神。各以次列。命製四方平定巾式頒行天下。

乙丑。詔續修元史。

時儒士歐陽祐等采訪故元元統以後事實還朝。仍命翰林學士宋濂侍制王禕爲總裁。儒士趙壘朱右貝璵。

朱世濂主議張孟兼高遜士李懋李汶張宣張簡杜寅
殷弼俞同十四人纂修之。

庚午命百官朝參左右相去不得越二尺其省府臺官俱
就甬道上拜謁。

上問吏部尚書崔亮曰朕郊祀天地拜位皆正中而百
官朝參則班東西以避正中此何禮也亮對曰臣聞天
子祭天升自午陛祭社升自子陛蓋社祭土而主陰陰
北方也故君升自子陛而南面答陰之意也郊祭天而
主陽陽南方也故君升自午陛而北面以答陽也何修
之議曰祭社北面君答之故南面祀天南面君答之故
北面若夫羣臣朝參於上非答神之義俱當避君上之

尊故升降則皆由卯陞朝班分列東西以避驛道此其義不同也。上曰臣之事主與君之事天其道不相遠也。因有是命但不得直行甬道。

召浙西蘓州富民至京。勉諭毋凌弱。毋吞貧。毋虐小。毋欺老。孝敬父母。和睦親族。周恤貧乏。遜順鄉里。各賜酒食而遣之。

癸酉。命中書省臣凡行郊祀禮。以天下戶口錢糧之籍陳于臺下。祭畢。收入內庫藏之。其天下城池山川地理形勝亦皆圖以成書藏之內庫。以垂久遠。

從太常少卿陳昧所奏。

癸未。追封故元帥郭子興爲滁陽王。妻張氏爲夫人。立廟。

滁州。

乙酉。指揮金朝興取東勝州。

獲平章荆麟等十八人。

命百官大朝會。天子衮冕御殿。則服朝服。見皇太子。則服公服。仍命製朝服以賜百官。

戊子。詔天下有司推訪賢才。以禮遣之。

三月。庚寅。免應天徽州等十三府州河南山東北平稅糧。丙申。給賜朝臣袍帶。凡二千八百一十三人。

丁酉。鄭州知州蘓琦言屯田積粟。并選皇臣分鎮要害。及墾田實中原三事。上令酌行之。

庚子。置秘書監。

秩正六品。監丞一員。直長二員。

辛亥。置南寧柳州二衛。改慶遠安撫司爲慶遠府。

都督同知汪興祖克武州朔州。

獲元知院馬廣等六百三十四人。家屬三千三百七十九人。

戊午。置察言司。以王文卿原本爲司令。

司令二人。吏二人。掌受四方奏章。

遣萊州府同知趙秩持詔諭日本國王良懷。不得出沒海濱爲患。

四月。辛酉。以封建諸王告太廟。禮成。宴羣臣於奉天門及文華殿。

甲子。禁蒙古色目人更易姓氏。

乙丑。冊封諸皇子爲王。

封第二子祺爲秦王。第三子櫜爲晉王。第四子 爲燕王。第五子橚爲吳王。第六子楨爲楚王。第七子榑爲齊王。第八子梓爲潭王。第九子杞爲趙王。第十子榲爲魯王。從孫守謙爲靖江王。

丙寅。諭東宮官屬及王府官屬盡心輔導。

上諭曰。輔導之臣。猶法度之器。必先正己而後正人。蓋德義者正人之法度。善惡者修身之衡鑑。汝等輔導諸子。必申其德義。明其善惡。使之趨正而不流于邪。如此則能盡輔導之職。觀之梓匠。雖有材木。必加繩削。乃能

成器。太子諸王必得賢輔導。因質贊助。乃能成德。朕擇汝等爲官寮。各宜盡心。又卽經史中古人已行之事。可爲鑒戒者。采摭其事。編次成集。朝夕覽觀。以廣智識。亦有助於輔導。羣臣受命頓首而退。復顧劉基曰。朕觀古賢聖之君。雖治平之世。而不忘修省。誠以富貴易至於驕奢。驕奢必至於荒縱。末有不顛覆者。故嘗戒太子諸王。以爲士不能正身修德。則殃及身。爲士且然。況於爲君。爲王者乎。基頓首對曰。陛下此言。萬世之福也。大將軍徐達等率師大敗故元王保保于沱兒峪。保保由寧夏奔和林。

癸酉遣吏部主事林唐臣賫詔封陳日煥爲安南王。

庚辰置弘文館。以胡鉉爲學士。命劉基危素王本中。睢稼皆兼學士。

乙酉。湖廣慈利縣土酋覃垕。構諸洞蠻爲亂。命湖廣行省平章楊璟以兵討之。

置磨勘司。綜核天下章奏。

五月。己丑。大將軍徐達分遣左副將軍鄧愈招諭吐番。自將所部取興元。

辛卯。遣使訪歷代帝王陵寢。

甲午。置司農司。開治所於河南。

上以中原之地。田多荒蕪。命省臣計民授田。設官以領之。司設卿一員。少卿二員。主簿錄事各一員。

乙未。嚴宮闈之政。著爲令。俾世守之。

皇后之尊。止得治宮中嬪婦之事。卽宮門外毫髮事不預焉。自后妃以下至嬪使女使小大衣食之費。金銀錢帛器用百物之供。皆尚宮奏之。而後發內使監官覆奏。方得赴所部關領。若尚宮不及奏。而朦朧發內官監。監官不覆奏。而輒擅領之部者。皆論以死。或以私書出外者。罪亦如之。宮嬪以下遇有病。雖醫者不得入宮中。以其證取藥而已。羣臣命婦於慶節朔望朝見中宮而已。無故卽不得入宮中。人君亦無有見外命婦之禮。天子及親王后妃宮嬪等。必慎選良家子女而聘焉。戒勿受大進。恐其夤緣爲奸。不利於國也。至於外臣請謁寺觀。

燒香禳告星斗之類其禁尤嚴。

詔天下守令詢有學識篤行之士禮送京師。

丁酉左副將軍李文忠左丞趙庸敗故元太尉蠻子平章沙不丁朶耳只八刺等于白海之駱駝山遂進次開平元平章上都罕等降。

都督孫興祖及燕山右衛指揮平定大興左衛指揮龐輝等兵次三不刺川遇胡兵力戰皆沒於五郎口海寧衛指揮副使孫虎率兵至落馬河與故元太尉買驢戰死之。已亥詔設科取士。

詔曰朕聞成周之制取才於貢士故賢者在職而其民有士君子之行漢唐及宋科舉取士各有定則然但貴

詞章之學而不求德藝之全。前元依古設科取士。而權家勢要。結納奔競。輒竊仕祿。所得資品。或居貢士之上。其懷才抱道之賢。恥與並進。甘隱山林。而不起風俗之弊。以至於此。今朕統一華夏。方與斯民。願得賢人君子用之。自今年八月爲始。特設科舉。以起懷才抱道之士。務在經明行修。博通古今。文質得實。才名相稱。其中選者。朕將親策於廷。觀其學識。第其高下。而任之以官。果才學出衆者。待以顯擢。使中外大臣皆由科舉而選。非科舉者。毋得爲官。彼游食之徒。自然易行。

遣使頒科舉詔于高麗安南占城。

大將軍徐達率諸將自徽州南出一百八渡至略陽。擒故

元平章蔡琳遂入沔州。

故元守將劉思忠知院金慶祥以興元諸大將軍徐達降。留裨將孫興旺張龍鎮守。

癸卯。左副將軍李文忠克應昌。

文忠聞元主於四月二十八日殂。督兵兼程圍其城。獲元主嫡孫買的里八剌并后妃宮人。暨諸王。省院達官士卒。并獲宋代玉璽金寶一十五宣。和殿玉圖書一。玉冊二。鎮國玉帶玉斧各一。及駝馬牛羊無筭。遣人俱送京師。

丁未。詔行大射禮。仍令太學生及天下郡縣學生員皆令習射。

戊申夏至祭皇地祇於方丘。

先期賜陪祀執事官明衣布樂舞生各給朝衣前祀二日詣仁祖廟告請配享。

辛亥詔定服色尚赤。

禮部奏夏尚黑殷尚白周尚赤秦尚黑漢尚赤唐服飾尚黃旗幟尚赤今承元之後尚赤爲宜上從之。

甲寅定神幣各色。

禮部奏古者禮神每神幣一故今郊祀天地及嶽鎮等神皆如其數如五嶽則用幣五是也至於太廟每室奉安帝后二神主止用幣一恐於節文未稱各室宜增幣一庶爲得宜且天地山川等神幣帛旣依古制天用蒼

地用黃日用赤月用白皆用本體之色。而五嶽五鎮四海亦各隨其方色。其四瀆及天下諸水宜用黑色。從之。湖廣行省平章楊璟督師攻土酋覃屋。賊遁入溪洞。

璟不悟。屋詐降。使部下黃永謙往報。爲屋所執。拒不下。璟請軍餉欲困之。上切責之。命叅政戴德以兵從璟。乃盡力攻之。賊遁去。官軍乃還。

丙辰。免蘇州漕糧三十萬五千八百餘石。

上因戶部請論官吏逋欠如律。憫民困。免之。

丁巳。論陣亡物故元帥都尉指揮等官無子孫承襲者。給祿米養其父母妻子。

鳳翔府寶雞縣進瑞麥一莖五穗者一本。二穗者十餘本。

上謂廷臣曰。昔鳳翔饑饉。朕憫其民。故特遣人賑恤。曾未數月。遽以瑞麥來獻。借使鳳翔未食粒。雖有瑞麥。何益。苟其民皆得養。雖無瑞麥。何傷。朕嘗觀自古以來。天下無金革爭鬪之事。國和民豐。家給人足。父慈子孝。夫義妻順。兄愛弟敬。風俗淳美。此足爲瑞。若此麥之異。特一物之瑞。非天下之瑞也。

六月癸亥。詔嶽鎮海瀆並去前代所封名號。皆以山水本名稱某神。

五嶽。東嶽太山之神。南嶽衡山之神。中嶽嵩山之神。西嶽華山之神。北嶽恒山之神。五鎮。東鎮沂山之神。南鎮會稽山之神。中鎮霍山之神。西鎮吳山之神。北鎮醫無

閭山之神。四海稱東海之神。南海之神。西海之神。北海之神。四瀆稱東瀆。大淮之神。南瀆。大江之神。西瀆。大河之神。北瀆。大濟之神。

定各處府州縣城隍。稱某府某州某縣城隍之神。

禁淫祠。

中書省奏。凡民庶祭先祖。歲除祀竈。鄉村春秋祈土穀之神。凡有災患。禱於祖先里社。若鄉厲。邑厲之祭。則郡縣自舉之。其僧道建齋設醮。不許奏章上表投拜青詞。亦不許塑畫天地神祇。及白蓮社。明尊教。白雲宗。巫覡扶鸞。禱聖書符咒水諸術。並加禁止。庶幾左道不興。民無惑志。詔從之。

壬申。謚元主曰順帝。

命禮部楊示凡北方捷至。嘗仕元者。不許稱賀。

命僧克新等三人往西域。詔諭吐蕃。仍命圖其所過山川形勢以歸。

左副將軍李文忠遣人送俘獲故元諸王買的里八剌等及其寶冊至京城。

省臣楊憲等請以買的里八剌獻俘於廟。寶冊令百官具朝服進。上曰。寶冊貯之庫。不必進也。古者雖有獻俘之禮。武王伐殷。曾用之乎。憲曰。武王事。殆不可知。唐太宗嘗行之。上曰。太宗是待王世克。若遇隋之子孫。恐不行此禮。元雖夷狄。入主中國。百年之內。生齒甚繁。

家給人足。朕之祖父亦預享其太平。雖古有獻俘之禮。不忍加之。只令服本俗衣以朝。朝畢。賜以中國衣冠。就令謝恩。復謂憲曰。故國之妃朝於君者。元有此禮。不必效之。亦令衣本俗衣。於中宮朝見。見畢。賜中國之服。亦令謝恩。

乙亥。封買的里八剌爲崇禮侯。

丙子。賞天策衛知事朱友文綺帛各五疋。

初。指揮張溫守蘭州。元將王保保兵圍城。溫督將士備守。夜二鼓。圍兵上城。千戶郭佑被酒醉卧。不知覺。巡城官軍擊却之。圍旣解。溫執佑斬之。友文諫曰。當賊犯城時。將軍斬佑以令衆。所謂以軍法從事。人無得而議之。

今敵旣退。乃追罪之。非惟無及於事。且有擅殺之名。竊以爲不可。溫悟杖佑而退之。上聞。謂侍臣曰。友文以幕寮能守朝廷法。直言開諭長官。此正人也。宜加賞賜。以勸其餘。

丁丑。頒平定沙漠詔于天下。仍令使齎詔諭安南高麗占城。

遣使詔諭元宗室部落臣民。

戊寅。遣使詔諭雲南八番西域西洋瑣里瓜哇畏吾兒等國。

上憫嵩縣劉典史任滿入覲服垢弊。以帛賜之。

庚辰。遣使葬宋理宗頂骨于紹興永穆陵。

先是上與學士危素論宋元興替素因言元世祖至元間胡僧嗣古妙高欲毀宋會稽諸陵時夏人楊璉真伽爲江南總攝奏請如二僧言遂發諸陵取其金寶以諸帝遺骨瘞於杭之故宮築浮屠其上以厭之又截理宗頂骨爲飲器天下聞之莫不心酸上聞嘆息久之謂素曰宋南渡諸君無大失德於元又非世仇元旣乘其弱併取之何乃復縱奸人肆酷如是耶令北平守將吳勉訪索頂骨所在果得西僧廬中旣送至命有司厝於京城之南至是紹興府以永穆陵圖來獻遂勅葬於故陵。

故元四大王寇大同武州指揮程桂等擊走之。

擒其三大王脫忽的帖木兒送京師。

辛巳詔大同倉入米一石大原倉入米一石三斗准給鹽一引引二百斤。商人鬻畢卽以原給引自赴所在官司繳之。

詔蘄州杭嘉湖民無田產者往臨濠開種以所種田爲世業官給牛種舟糧資遣仍三年不徵其稅。

時從徙者四千餘戶。

乙酉故元陝西行省吐番宣慰使何鎖南普等以元所授金銀牌印宣勅詣左副將軍鄧愈軍門降及鎮西武諸王卜納剌亦以吐番諸部來降。

先是陝西行省員外郎許允德招諭吐番十八族大石

門鐵城洮州岷州等處。於是何鎖南普來降。

七月丁亥。續修元史成。詔刊行之。

賞學士宋濂銀二十兩。文綺帛各二。授儒士張宣等官。惟趙壘朱右朱世濂乞還田里。從之。

禮部尚書崔亮奏定。皇太子以下。及文官三品以上。武官四品以上。上殿者坐墩之制。

其制皇太子及親王。以青爲質。綉蟠螭雲花爲飾。宰相及一品。以赤爲質。飾止雲花。二品以下。蒲墩爲飾。凡大朝會宴。賜坐墩。退朝燕閒。及行幸之處。則中書省大都督府官三品以上。及勲舊之臣。文學之官。賜坐者。仍加絨褥。綉縛。命如其式制之。

辛卯命編直隸應天等十八府州及江西九江饒州南康三府均工夫圖冊

每歲農隙其夫赴京供役歲率三十日遣歸。

詔建諸王府。

工部尚書張允奏諸王宮城宜各因其國擇地請秦用陝西臺治晉用太原新城燕用元舊內殿楚用武昌箬竹寺基齊用青州益都縣治潭用潭州玄妙觀基靖江用獨秀峰前上可其奏命明年以次營之。

翰林學士宋濂待制王禕坐失朝降爲編修。

丙申定功臣守墓人戶各以封爵官品差等給之。

丁酉免明州虧鹽五千四百引。

御史臺奏令官吏陪賞。上恐殃及小民免之。

壬寅賜文武官朝服。

命平章胡廷美往河南開封等府招集故元王保保所部亡散士卒。凡占籍在洪武元年者聽。二年以後者收入兵伍。

甲辰賜崇禮侯買的里八剌母妃以下鑲金銀首飾并紗羅布服。

僞夏明昇將吳友仁寇興元守將金興旺擊却之。

中書左丞楊憲以罪伏誅。

憲市權要寵陰忌害人以嗾御史劉炳劾汪廣洋事發劉基併發其奸狀及諸陰事。上大怒按問皆實誅之。

丙辰。上慨內藏皆民力所供。諭臣下宜儉約以省浮費。八月丙子。禁官民器服不得用黃色爲飾。及彩畫古先帝王后妃聖賢人物故事。日月龍鳳獅子麒麟犀象之形。如舊有者。限百日內毀之。

癸未。定宗廟四時之祭。皆用孟月。及歲除。凡五祭。其清明等節。各備時物薦享。

禮部尚書崔亮奏請改正。

定親王從享功臣配享儀。

乙酉。詔在京軍儲倉。增設京畿漕運司官。專督其事。

諭中書省臣遣人循歷水陸。收遺骸瘞之。

是月京師及各行省開鄉試。

自初九日始試初場十二日試第二場十五日試第三場京師直隸府州額百人河南山東山西陝西北平福建江西浙江湖廣各四十人廣東廣西各二十五人若人材衆多之處不拘額數若不能及數者亦從之考試之法大略損益前代之制初場四書疑問本經義及四書義各一道第二場論一道第三場策一道中式者復十日後以五事試之曰騎射書筭律騎觀驅馳便捷射觀其中之多寡書通於六義筭通於九法律觀其決斷九月戊子改東獄行祠爲京師城隍上親爲文以告之禮部尚書陶凱因舊卑隘請改之

辛卯放大子賓客梁貞還田里

詔翰林侍讀學士魏觀自今太廟止稱孝子皇帝。凡遣太子行禮止稱命長子某著爲令。

戊申。詔以故元降將江文清爲千戶。楊思祖爲衛鎮撫。因遣還招其部曲。

甲寅。遣斷事黃儔詔諭遼陽等處官民率衆來降。

乙卯。定朝會宴享樂舞之數。

凡奏樂曲皆按月律。前三奏和緩。中四奏壯烈。後二奏舒長。起臨濠之曲。名飛龍引。開太平之曲。名風雲會。安建業之曲。名慶皇都。削羣雄之曲。名喜昇平。平幽都之曲。名賀聖明。撫四夷之曲。名龍池宴。定封賞之曲。名九重歡。大一統之曲。名鳳凰吟。守昇平之曲。名萬年春。其

十二月按律樂歌正月爲萬年春。二月爲玉街行。三月爲賀聖明。四月爲喜昇平。五月爲樂清朝。六月爲慶皇都。七月爲永太平。八月爲鳳凰吟。九月爲飛龍引。十月爲龍池宴。十一月爲金門樂。十二月爲風雲會。其武舞曲名清海宇。文舞曲名泰階平。

修禮書成。賜曰大明集禮。

其書以吉凶軍賓嘉冠服車輅儀仗鹵簿字學樂爲綱。所該之目。吉禮十四。曰祀天。曰祀地。曰宗廟。曰社稷。曰朝日。曰夕月。曰先農。曰太歲。風雲雷雨師。曰嶽鎮海瀆。天下山川城隍。曰旗纛。曰馬祖。先牧社馬。步曰祭厲。曰祀典。神祇曰三皇孔子。嘉禮五。曰朝會。曰冊拜。曰冠禮。

曰婚曰鄉飲酒禮。賓禮二。曰朝貢。曰遣使。軍禮三。曰親征。曰遣將。曰大射。凶禮二。曰吊。曰喪儀。又冠服車輅儀仗鹵簿字學各一樂三。曰鍾律。曰雅樂。曰俗樂。凡升降儀節度制名數纖悉備具。通五十卷。詔頒行之。授曾魯徐一夔周子諒董夔以官。惟梁寅等六人以疾賜還鄉里。俱賞賜有差。

十月丙辰。勅省臺延聘儒士於午門。番直與諸將說書。從御史袁凱所奏。

丁巳。勅百官入朝。遇雨雪皆服雨衣。

上因二內使乾靴行雨中。詔責之。因下此勅。

癸亥。命江夏侯周德興爲征南將軍。率兵討慈利縣土酋。

覃皇及茅岡諸洞蠻仍命潭州常德等衛官軍悉聽調遣。初平章楊璟攻屋見官軍勢威遁去。至是復出爲寇。故命德興討之。

己巳廣西向武州土官知州黃世鈇父至威來朝貢馬及方物。

辛巳遣使致書故元太子愛猷識里達剌。

乙酉命作大廟主瓚。

從禮部崔亮所請。

十一月壬辰車駕出勞征虜大將軍徐達左副將軍李文忠於江上。

達等平沙漠還上出勞之明日達率諸將上平沙漠。

表。

丙申。大封功臣。

封公者六人。李善長封韓國公。徐達封魏國公。常遇春
子茂封鄭國公。李文忠封曹國公。馮勝封宋國公。鄧愈
封衛國公。封侯二十八人。湯和封中山侯。唐勝宗封延
安侯。陸仲亨封吉安侯。周德興封江夏侯。華雲龍封淮
安侯。顧時封濟寧侯。耿炳文封長興侯。陳德封臨江侯。
郭子興封鞏昌侯。王志封陸安侯。鄭遇春封榮陽侯。費
聚封平涼侯。吳良封江陰侯。吳禎封靖江侯。趙榮封南
雄侯。廖永忠封德慶侯。俞通源封南安侯。華高封廣德
侯。楊璟封營陽侯。康鐸封蘄春侯。朱亮祖封永嘉侯。傅

三
日
不
正
統
二
卷
五
友德封潁川侯。胡廷美封豫章侯。韓政封東平侯。黃彬封宜春侯。曹良臣封宣寧侯。梅思祖封汝南侯。陸聚封河南侯。

賞陝西蘭州等處守禦將士。

丁酉以定功封爵詔天下。

戊戌大宴諸功臣。

祭戰沒功臣。

辛丑諭諸武臣親近儒臣講求古名將成功立業故事。

辛亥詔覈民數給以戶帖。

乙卯封中書左丞汪廣洋爲忠勤伯。御史中丞兼弘文館學士劉基爲誠意伯。

十二月癸亥。故元主之子失篤兒國舅何里麻思海牙駙馬忙哥失等來降。詔各賜第宅。

己未。詔陝西大小鹽池設鹽課提舉司。

辛酉。大明志書成。

先是。命儒士魏俊民。黃箴。劉儼。丁鳳。鄭思先。鄭雄等六人。類編天下州郡地理形勢。降附始末。爲書。凡天下行省十二。府一百二十。州一百八。縣八百八十七。安撫司三。長官司一。東至海。南至瓊崖。西至臨洮。北至北平。至是。成書。命送秘書監。鋟梓頒行。俊民等皆授以官。

甲子。建奉先殿。

詔禮部尚書陶凱議。凱請於乾清宮左。別建奉先殿。以

奉神御。每日焚香朔望薦新節序及生辰皆于此祭祀用常饌行家人禮。上從之。

命京都王國各府州縣祭無祀鬼神。

歲以三月清明七月望及十月朔長吏率寮佐致祭。詔定公侯儀從。

丙寅長沙洞苗作亂江夏侯周德興討平之。

辛巳禮部尚書陶凱請選人專任東宮官。上諭止之。

上曰朕以廷臣有才望勲德者兼東宮官非無謂也。嘗慮廷臣與東宮官屬有不相能遂成嫌隙或生奸謀離間骨肉其禍非細。若江克之事可爲明鑑。朕今立法令省臺都督府官兼東宮官贊輔之職父子一體君臣一

心庶幾無交構之患也。

壬午日中有黑子。詔廷臣言得失。

起居注萬謚言曰者陽之精也。至陽之中而有黑子焉。是陰之奸乎陽也。其在人事。德爲陽。刑爲陰。君子爲陽。小人爲陰。刑勝乎德。小人勝乎君子。臣請凡臣民有罪。法當死者。皆三覆奏。毋輒置之刑。小人而奸君子之位者。黜之。庶乎天象感也。吏部尚書郎本中言曰者君之象也在。陛下修德以禳之。君德修則天變自消。昔宋景公一言之善。災惑猶爲之退舍。況陛下以天錫之資。誠能益加修省。何天變之不回哉。且河南中原之士。隱於山林者。宜訪求之。仕於朝者。有能加其官。或不能

者加其黜罰焉。凡天之仁愛人君。鑒視告戒。無所不在。則人君體之於心而施之於政者。亦當無所不用其情也。詩曰。明明在上。赫赫在下。天人感應之機如此。願陛下無忽。上皆嘉納其言。

甲申。命禮部尚書陶凱鑄齋戒銅人。

高一尺有五寸。手執書簡曰齋戒三日。凡致齋之期。置御前。使心有所警省。

辛亥。洪武四年正月乙酉朔。

丙戌。中書左丞相太師韓國公李善長乞致仕。從之。以中書右丞忠勤伯汪廣洋爲中書右丞相。叅知政事。胡惟庸爲中書右丞。

丁亥。上親祀上下神祇。告伐明昇。命中山侯湯和爲征南將軍。江夏侯周德興爲左副將軍。德慶侯廖永忠爲右副將軍。暨營陽侯楊璟。都督僉事葉昇。率京衛荆湘舟師。由瞿塘趨重慶。潁川侯傅友德爲征虜前將軍。濟寧侯顧時爲左副將軍。都督僉事何文輝等。率河南陝西步騎。出秦隴趨成都。

命中書左丞相徐達往北平。操練軍馬。繕治城池。詔濟南濟寧青州萊州徐州等衛悉聽達節制。

戊子。命宋國公馮勝往陝西修城池。

命衛國公鄒愈往襄陽訓練軍馬。運糧餉以給征蜀軍士。詔定親祀圓丘方丘宗廟及朝日夕月服衮冕祭星辰社

穆太歲風雲雷雨嶽鎮海瀆山川先農皆用皮弁服陪祭
官各服本品梁冠祭服。

己丑。製玉圖記一。賜皇太子。

文曰大本堂記。

戊戌。製玉圖記二。賜中官。

文曰厚載之記。

己亥。御史臺進擬憲綱。

凡四十條。上親加刪定。頒給羣臣。

中書省臣上天下府州官數。

府州縣凡一千二百三十九。官五千四百八十八員。

癸卯。詔中書省以庫所儲布帛製綿襖運赴蔚朔寧夏等

以給將士。

甲辰。修治廣西興安縣三十六靈渠。徙屬桂林府。

修馬援故渠。可溉田萬頃。

乙巳。詔宦官月支廩米壹石。

二月戊午。翰林侍讀學士張以寧。吏部主事林唐臣。翰林編修王廉。自安南使還。其王陳日燾遣其臣阮汝亮偕來。上表謝恩。貢方物。

以刑部郎中劉惟謙爲尚書。

上諭之曰。膏粱所以克饑。藥石所以療病。使無病之人。舍膏粱而餌藥石。適足以害身。仁義者養民之膏粱也。刑罰者懲惡之藥石也。故爲政者。舍仁義而專務刑罰。

是以藥石毒民非善治之道也。今擢卿爲刑官之長。卿於用法之際常體古人欽恤意。則張釋之于定國皆可爲矣。卿其勉之。

詔各省鄉試連試三年。

是後則三年一舉著爲定例。

命中書省戶部定文武官歲祿。

命侍讀學士詹同國子司業宋濂考試禮闈。

戊辰奉先殿成令禮部製四代帝后神位衣冠并定諸

祭儀物及常用祝文。

辛未命工部遣官往廣東買耕牛以給中原屯種之民。

壬申中書省奏會試舉人俞友仁等

命戶部定淮浙中鹽之例。

甲戌故元遼陽守將平章劉益以遼東州郡地圖并籍其兵馬錢糧之數遣右丞董遵僉院楊賢奉表來降。詔置遼東衛指揮使司以益爲指揮同知。

三月乙酉廷試會試中式舉人賜一甲吳伯宗郭玗吳公達進士及第賜二甲楊自立等十七人進士出身賜第三甲姚宗敬等一百人同進士出身。

詔賜伯宗朝衣冠帶授禮部員外郎高麗入試者三人惟金濤登第授東昌府安丘縣丞林實卞伯儒皆不第三人皆以不通華言請還本國。詔厚給道里費遣舟送還。

癸巳廣西衛指揮僉事左君弼等平溪洞蠻獠賞綺帛各有差。

丁未詔大小武臣亡沒者卹世襲。

遣使祭歷代帝王陵寢。

上諭古先聖帝賢王以及歷代帝王曾主中原安人民者皆春秋祭祀偏安之君雖賢不祭主中原而昏愚者亦不祭。

壬寅詔臨濠之田驗丁力計畝給之不許兼并者多占。

閏三月巳未賜功臣守墳人戶。

甲子命吏部定內監等官品秩自監令正五品以下至從七品有差。

上謂侍臣曰。古之宦豎。不過司晨昏供役使而已。自漢鄧太后以女主稱制。不接公卿。乃以閹人爲常侍。小黃門通命。自此以來。權傾人主。及其爲患。如城狐社鼠。不可以去。朕謂此輩。但當服事宮禁。豈可假以權勢。縱其狂亂。吾所以防之極嚴。但犯法者。必斥之。不令在左右。戒履霜堅氷之意也。

壬午。詔獎吳興王昇。善教子。賜金絹以旌之。仍復其家。昇子爲平涼知縣。以書托御史幕官宇文桂達之。因刑部搜獄中囚。得其私書以奏。上覽其書內云。凡爲官。須廉潔自持。貧者士之常也。古人謂貧乏不能存。此是好消息。撫民以仁慈爲心。報國以忠勤爲本。處已以謙。

敬爲先進修以學業爲務。有暇日。宜玩經史。至於先儒性理之書。亦當潛心其間。於此見得透徹。則自然思無邪。又熟讀律令。則守法不惑。仕與學。益不可偏廢。人便則買附子二三枚。川椒一二斤。必經稅而後來。餘物非所覲也。上嘉嘆良久。下詔諭之。

四月克蜀階州。

先是潁川侯傅友德陛辭。上密諭之曰。蜀人聞吾西伐。必悉其精銳。東守瞿塘。北阻金牛。以拒我師。彼必謂地險而兵難至。若出其不意。直擣階文門戶。旣陳。則腹心自潰。兵貴神速。但患卿等不勇耳。友德受命。馳至陝。集諸道兵。揚言出金牛。而使人潛覘。知渠州果陽空虛。

階文雖有兵壘而守備單弱於是引兵趨陳倉選精兵五千爲前鋒攀緣山谷晝夜兼行大軍繼之直抵階州蜀守將平章丁世真率衆來拒友德擊敗之生擒其將雙刀王等十八人世真遁去遂克階州。

中山侯湯和率師克歸州李逢春烽火山寨分遣南雄侯趙庸宣寧侯曹良臣帥兵取桑植容美洞及會江夏侯周德興合攻茅岡單屋寨平之。

克文州。

友德兵至文州距城三十里蜀人斷白龍江橋以阻我師友德督兵修橋以渡至五里關蜀平章丁世真等復集兵據險都督同知汪興祖躍馬直前中飛石死友德

怒奮兵急攻破之。世真徑以數騎遁去。遂拔之。

庚寅。上以湯和傅友德等伐蜀。三月未得捷報。命永嘉侯朱亮祖率兵助之。

丁酉。潁川侯傅友德下渠州果陽。留指揮潘忠守之。

癸卯。克綿州。

友德徇下江油彰明二縣。遂趨綿州。遣都督僉事藍玉夜襲其壘。蜀將向大亨軍驚擾達旦。友德麾兵乘之。蜀兵大敗。大亨走保漢州。遂克綿州。

戊申。冊開平忠武王常遇春女爲皇太子妃。

辛亥。定太廟合祭功臣配享儀制。

詔立祠祀元御史大夫福壽。

五月乙卯。詔免江西秋糧。

丁巳。以李守道詹同爲吏部尚書。

上諭曰。吏部者衡鑑之司。鑑明則物之妍媸無所遁衡。平則物之輕重得其當。益政事之得失在庶官。任官之賢否由吏部。任得其人則政理民安。任非其人則瘝官曠職。卿等居持衡之任。宜在公平。以辨賢否。毋但庸庸碌碌克位而已。

丙寅。詔立大社壇於中都。

乙亥。詔免兩浙秋糧。

己卯。穎川侯傅友德造戰艦。成將兵漢州。

友德欲以軍中消息達湯和。而山川懸隔。適江水暴漲。

乃以木牌數千書克階文綿州日月投漢江順流而下蜀守者見之爲之解體

六月壬午克漢州

初夏人聞王師伐蜀命丞相戴壽大尉吳友仁等悉衆守瞿塘及聞友德破階文下江油乃分兵還援漢州而舟師已逼漢州向大亨悉兵拒戰友德擊破之旣壽兵至友德下令諸將曰彼勞師遠來聞向大亨兵敗衆心洶洶一戰可克也乃親率師迎擊壽兵大敗遂拔漢州擒其招討黃龍萬戶梁士達等百餘人壽與大亨走成都臨江侯陳德追擊敗之獲其卒三千餘人馬三百匹友仁走古城友德乃以濟寧侯顧時守漢州自將擊古

城又大敗其衆擒殺二千餘人并擒宣慰胡孔章等獲馬騾五百餘匹友仁自古城道還保寧。

戊子德慶侯廖永忠大敗蜀兵于舊夔州。

辛卯拔瞿塘入夔州。

永忠進兵瞿塘關以山勢峻急而蜀人設鐵索飛橋橫據關口我舟不得進乃密遣壯士數百人舁小舟踰山渡關以據上流人持糗糧帶水筒以禦饑渴山多草木令將士皆衣青蓑衣魚貫山岩石間蜀人不之覺也度其已至乃率精銳出墨葉渡分爲兩道夜五鼓以一軍攻其陸寨以一軍攻其水寨將士皆以鐵裹船頭置火器而前黎明蜀人盡銳來拒永忠已破其陸寨矣旣而

將士舁出江者一時俱發上流揚旗鼓譟而下蜀人出不意大駭而下流之師亦擁舟前進發火箭火炮來擊大破之其將鄒興中火箭死遂焚其三橋斷其橫江鐵索擒同僉蔣達等八千餘人斬首千餘級溺死者無筭飛天張鐵頭張等皆遁去遂入夔州明日中山侯湯和兵亦至分道並進和率步騎永忠率舟師約會于重慶戊戌僞夏平章丁世真率衆陷文州指揮僉事朱顯忠死之

僞夏趙元帥與世真合兵攻城城中食且盡外援不至部下皆曰與其陷死地孰若出城求生路乎顯忠厲聲曰爲將守城城存與存城亡與亡豈有求活將軍耶詰

旦世真攻圍益急。顯忠遂出兵東門拒戰。而世真復攻西門。日且暮。顯忠被傷。褰瘡決戰。力不支。城破。爲亂兵所殺。千戶王均諒被執。不屈。蜀人磔之于文州東門。初顯忠領士卒七百餘人。及城破。僅一百人。旣而友德調兵來援。世真棄城遁去。事聞。使祭顯忠。均諒厚恤其家。僞夏守金州九龍山寨平章俞思忠率其官屬軍民二千餘百人詣軍門降。獻良馬千匹。

友德遣人送至京。上命還其馬。賜第居京師。

壬寅。故元右丞張良佐左丞房嵩遣叅政張華等貢馬。及送殺劉益逆黨平童八舟等至京。并上故元所授印章。宣勅金牌。詔以張良佐房嵩爲遼東衛指揮僉事。

癸卯克重慶僞夏明昇面縛啣璧與母彭氏及其右丞劉仁等奉表詣軍門降

初廖永忠乘勝抵重慶劉仁勸明昇奔成都昇母彭氏泣曰事勢如此縱往成都不過逃命旦夕何益仁曰然則奈何彭氏曰大軍入蜀勢如破竹今城中兵民雖數萬膽破心悸豈能効力若驅之拒守死傷必多亦終不免也不如早降以免生靈鋒鏑昇遂遣使詣永忠軍營納款永忠以湯和軍未至辭不受及和至來降和受璧永忠解縛承制撫慰下令將士不得侵掠撫諭戴壽向大亨等家令其子弟持書往成都招諭遣指揮萬德送昇等并降表于京師

詔定武臣金銀牌制。

上親制文給之曰。上天祐民。朕乃率撫威加華夷。實憑虎臣。錫爾金符。永傳後嗣。字皆陽文。

戊申制宴享九奏樂章成。

詹同陶凱同上之。其曲一曰本太初。二曰仰大明。三曰民初生。四曰品物亨。五曰御六龍。六曰泰階平。七曰君德成。八曰聖道成。九曰樂清寧。

魏國公徐達徙北平山後之民三萬五千八百戶。一十九萬七千二十七口。散處衛府籍爲軍者給衣糧。籍爲民者給田以耕。凡已降而內徙者戶三萬四千五十六。

七月辛亥存心錄成。

上覽之謂諸儒臣曰朕聞歷代賢君事神之道罔不祗肅故百靈效祉休徵類應及乎衰世之君罔知攸敬違天慢神非惟感召災譴而國之禍亂亦由是而致朕爲是懼每於臨祭必誠必敬惟恐未至故命卿等編此書欲示鑒戒夫水可以鑒形古可以鑒今是編所載善惡豈惟行之于今將俾子孫以爲法守

以豐城知縣林唐臣爲吏部考功郎中

唐臣名弼漳州人與修元史授考功主事上嘉其使安南不受贖命知豐城以事逮至京於獄中陳情詔釋之陞前官

諭中書不必奏祥瑞如災異蝗旱之事卽時報奏

置定遼衛都指揮使司。總轄遼東諸衛軍馬。修治城池。以馬榮葉旺爲都指揮使。

庚申。潁川侯傅友德兵圍成都。僞夏丞相戴壽知院向大亭以城降。

初。壽等以象載甲士列陣拒戰。友德擊敗之。及聞重慶已下。遂納款。得士馬二萬。友德分兵徇下州縣之未下者。

壬戌。下崇慶州。

友德擊敗知州尹善清。斬之。判官王桂葉率耆民降。

乙丑。制授明昇爲歸義侯。賜冠帶衣服。居第於京師。

初。昇至。中書省擬宋待孟景儀以進。上曰。明昇與孟

梟不同梟專治國政所爲奢縱昇年幼事由臣下宜免其叩頭伏地上表請罪之禮。

淮安侯華雲龍襲破雲川故元平章僧家奴營擒之盡俘其衆并獲駝馬四百餘匹。

占城國王阿答阿者遣陪臣奏安南侵其土地。命中書省移咨安南國王卽日罷兵各保疆土。

乙亥命太常寺祀馬祖。

先是蜀明昇獻良馬一匹色正白身長十有一尺首高九尺足高七尺有肉隱起項下厚五分廣三寸餘貫膺絡腹精采流動韉勒不可近近之輒人立而吼。上謂天旣生此英物必有神以司之命太常以少牢祀馬祖。

復囊沙四百斤壓馬。令人跨其上。日遊行苑中。久之。性漸馴服。後上夕月於清涼山。乃乘之而出。如躡雲乘風。馳驅甚適。上大悅。賜名飛越峰。

唐辰僞夏平章丁世真率餘黨寇秦川。戰敗遁走。爲小校所殺。中書奏請賞小校。詔止之。

上曰。小校殺本管。非義也。何賞爲。不許。

八月辛巳。改制用寶金牌二副。中書省與大都督府各掌之。

凡軍機文書。非大都督府長官與中書丞相及在省長官。不許入奏。亦不許擅自請奏。若有詔急令調軍。中書省即會大都督府官同入覆奏。然後各出所藏金牌入

內請寶入用如大都督府先奉 旨亦如之其有不行約會以姦臣論。

癸未 皇第十二子生。

癸巳淳泥國馬合漠沙遣其臣亦思麻逸進表箋貢方物。詔賜文綺答之。

貢有鶴頂朱玳瑁孔雀梅花龍腦米西泮白布及降香黃蠟等物。

己亥周德興等克保寧。

先是遣諭湯和等曰。今全蜀已下。惟吳友仁尚據保寧。偷旦夕之命。乘機而取之。此破竹之勢。無不克者。將軍徘徊不進。何也。吾付將軍以大任。而臨事徃徃逗撓。如

此何以總軍政寄國命乎。和等聞詔始遣周德興會傅友德兵克其城。執吳友仁械送京師。蜀地悉平。

戊申。潁州上猶縣山寇作亂。命宜春侯黃彬領兵討捕之。

高州府海寇羅子仁等作亂。殺通判王名善。雷州衛千戶黃青領兵擒子仁等殲之。

九月庚申。三佛齊國王馬哈刺札八刺卜遣其臣玉的力馬罕亦里牙思奉金表來朝。貢黑熊火雞孔雀五色鸚鵡及諸香。玳羅綿被。莎布物。詔賜文綺答之。

辛未。諭省府臺臣。以蠻夷小國阻山越海。僻在一隅。不爲中國患者。不可輒自興兵。惟西北胡戎世爲中國患。不可

不謹備。

乙亥詔親祭天地宗廟齋五日祀日月星辰社稷山川風雲雷雨齋三日降香齋一日著爲令。

丙子置成都衛右中前後四衛。

初成都旣克潁川侯傅友德等留官軍守之及曹國公李文忠經理四川以舊城低隘增築新城高壘深池規模粗備而友德猶駐兵保寧中山侯湯和駐兵重慶各遣人招輯番漢人民及明氏潰亡士卒來歸者因籍其壯丁置各衛以分隸之。

置保寧守禦千戶所。

初王師克保寧潁川侯傅友德留和陽衛指揮黃榮駐

守。至是曹國公李文忠調濠梁等衛官軍置千戶所守之。

十月庚辰諭天下有災變卽以實上聞。

癸巳日本國王良懷遣其臣僧祖來進表箋貢馬方物并僧九人來朝又送至明州台州被虜男子七十餘口。詔賜文綺答之。

丁未置叙南青州二守禦千戶所

十一月庚申命自今官吏犯贓罪者無貸。

壬申戒責指揮郭英私役軍士爲私室宥令改過。

十二月乙酉吏部奏天下府縣官數。

府一百四十一。官八百八十。州一百九十二。官五百七

十二縣一千三百官三千四十一。

定文武官祖父封贈之典。

丙戌淮安侯華雲龍遣人送故元惠王伯都不花儲王伯顏不花宗王子蠻伯帖木兒至京獻馬及金寶金印金銀字圍牌。上命賜第宅錦綉襲衣及帷幔裯褥什器等物。仍月給錢米有差。

詔靖江侯吳禎籍方國珍所部溫台慶元三府軍士及蘭秀山無田糧之民嘗克船戶者凡十一萬一千七百三十人隸各衛爲軍。仍禁濱海民不得私出海。

辛卯賞平蜀將士。

惟榮陽侯楊璟南雄侯趙庸永嘉侯朱亮祖不與賞。

癸巳。逮漢中知府費震至京。詔釋之。

丙申。置永寧貴州二衛。及瞿塘漢中階州三守禦千戶所。皆曹國公李文忠經理。

戊戌。詔定官民揖拜禮。

宜春侯黃彬平贛州上猶山寇還。命賞其將士文綺錢帛有差。

壬子。洪武五年正月己酉朔。

壬子。置親王護衛指揮使司。

每王府設三護衛。設左右中前後五所。所設千戶二人。百戶十人。設圍子手二所。每所千戶一人。

詔今後犯罪當謫兩廣克軍者俱發臨濠屯田。

瑣里國王卜納的遣其臣撒馬牙葉加兒幹的亦刺丹八兒山奉金葉表貢方物。詔厚賜文綺答之。

馬一匹。紅撒哈刺一連。紅八者藍布四疋。紅番布二疋。凱本里布四疋。珠子頂串一副。并繪其土地山川以獻。癸丑遣翰林待制王禕偕蘓成齋詔諭雲南。梁王久留禕不遣死之。

上諭禮部近代以來舉人不中式。徃徃謗毀主司。今後有此者罪之。

甲子。遣楊載持詔諭琉球國。

乙丑。詔賜魏國公徐達曹國公李文忠宋國公馮勝交趾弓五十。彤弓百。

庚午。五色雲見。

命魏國公徐達爲征虜大將軍。出中路。曹國公李文忠爲左副將軍。出東路。宋國公馮勝爲征西將軍。出西路。三道並進。以清沙漠。

時王保保爲邊患。達等勸領兵剿絕之。

命靖海侯吳禎率舟師運糧遼東。以給軍餉。

上以古州田州澧州等處洞蠻嘗梗化。作亂。命衛國公鄧愈爲征南將軍。江夏侯周德興。江陰侯吳良爲副將軍。討之。

愈率荊陽侯楊璟。宜春侯黃彬。出澧州。德興率南雄侯趙庸。指揮僉事左君弼。出南寧。良率平章李伯昇。出清

州三道並進。

戊寅故元知院阿輦真巴審王子赤斤帖木兒等來降。貢馬賜衣一襲。令馳傳詣浙江徧觀城邑山川。

二月己卯諭羣臣盡心修職無負國家。

上諭曰居官者任之大小雖不同。要皆盡其職而已。昔范文正公居位。凡一日之所爲。必求與食相稱。或有不。及明日必補之。其心始安。賢人君子於國家盡心如此。朝廷豈有廢事。天下安得不治。元之將亡。內外諸官皆安於苟且。不修職事。惟日食肥甘。因循度日。凡生民疾苦政事得失。略不究心。紀綱廢弛。民心日離。遂至土崩。此皆近事。可爲明鑒。朕每夜不安寢。未明視朝。嘗恐天

下之事或有廢怠不舉民受其弊卿等當體朕懷貳夜盡心能修厥職無負國家異日垂名青史豈不美乎丙戌安南陳叔明遣其臣阮汝霖來朝奉表貢象詔却之

禮部已受其表主事曾魯取其副視之曰前王乃日燧今表曰叔明必有故也亟白尚書詰之益叔明逼死日燧而奪其位懼朝廷致伐故托修貢以覘意汝霖不隱具言之上曰島夷何狡猾如此却其貢不受

戶部奏大原陽曲縣負納鹽糧米二千五百八十餘石

詔悉蠲之

戶部奏准四川茶稅候西蕃易馬

產巴茶凡四百七十七處。茶二百三十八萬六千九百四十三株。茶戶三百一十五。宜依制每茶十株。官取其八。徵茶二兩。無戶茶園。令耨種以十分爲率。官取其八。歲計得茶一萬九千二百八十斤。令有司貯候西番易馬。

戶部奏准會計四川鹽數開煎。

出鹽共計一千四百五十六處。已開煎三百八十處。其未開者一千七十六處。遂命會計各郡邑軍民歲食及鹽馬司市馬歲額之數。煎辦餘井塞之。

三月辛亥。命禮部重定官民相見禮。

詔庶民婦女袍衫止以紫綠。梔紅及諸淺淡顏色。其大紅。

鴉綠青黃色。悉禁勿用。帶以藍絹布爲之。

丁卯。都督藍玉擊敗王保保兵於土刺河。

辛卯。詔車駕出入。有司肅清道路。官民不許開門觀望。行立所在。官員父老合迎駕者。於仗外路左叩頭俯伏。俟車駕前行方起。

高麗王顥遣密直同知洪師範等奉表賀平夏貢方物。且請子弟入大學。

上謂中書省臣曰。高麗欲遣子入大學。此亦美事。但其涉海遠來。離其父母。未免彼此懷思爾。宜令其王與羣下熟議之。爲父兄者。果願遣子弟入學。爲子弟者。果願聽父兄之命。無所勉強。卽遣使護送。至京。或居一年。或

半年聽其歸省也。

四月戊寅廣西官軍討平宣化盜命大都督府按南寧指揮左君弼激變罪禁戢其卒。

戊戌詔天下舉行鄉飲酒禮。

庚子衛國公鄧愈遣棨陽侯楊璟等討澧州散毛柿溪赤松安福等三十九洞平之。

五月命中書省以綿裘賜遼東將校以衣鞋三萬給戍卒。戊午夏至祭皇地祇於方澤。

上憂天久不雨命皇后妃而下皆蔬食是夜大雨。

皇后具冠服賀曰妾侍陛下二十年每見愛民之心拳拳於念慮之間今茲天旱陛下誠言所孚天心感格遂

致雨澤之應。民得足食。妾敢進賀。上曰。人君所以養民也。民與君爲一體。民食有缺。吾心何安。幸天垂念。獲茲甘雨。吾何德以堪。皇后能同心憂勤。天下國家所賴也。

六月丙子。定宦臣禁令。

丁丑。命禮部議宮官女職之制。

定設六局。凡官七十五人。女使十八人。

戊寅。征西將軍馮勝。左副將軍傅友德率師至甘肅。故元將上都驢降。

初。勝等師次蘭州。友德先率驍將五千人直趨西涼。遇元失罕刺之。兵戰敗之。至永昌。又敗元大尉朶兒只巴。

于忽刺罕口大獲其輜重馬牛。進至掃林山。勝等師亦至。其擊走胡兵。友德手射死其平章不花。追斬其部落四百餘人。降大尉鎖納兒加平章管著等。至是上都驢知大軍至。帥所部吏民人八百三十餘戶迎降。勝等撫輯其民。留官軍守之。遂進至亦集乃路。守將伯顏帖木兒全城降。師次別駕山口。元岐王朶兒只班遁去。追獲其平章長加奴等二十七人。及馬駝牛羊十餘萬。友德復引兵至瓜沙州。又敗其兵。獲金銀印。馬駝牛羊二萬而還。

癸巳。定六部職掌。歲終考績以行黜陟。

丁丑。定命婦冠服制。

壬寅。命中書省預送戰襖三萬。鞋六萬八千。綱給徃征。甘肅軍士。

左副將軍李文忠率師深入。敗虜將蠻子哈刺章騎于土刺河。

文忠率何文輝等兵至口溫之地。虜聞之夜棄營遁。獲其牛馬輜重無筭。遂進至哈刺莽來。虜部落驚潰。復進兵至驢胸河。文忠諭將士曰。兵貴神速。宜乘勝追之。千里襲人。難以重負。於是留部將韓政等守輜重。命士卒仍持二十日糧兼程而進。至土刺河。虜將蠻子哈刺章覘之。悉騎渡河。結陳以待。文忠督兵與戰。數合。虜稍却。復進至阿魯渾河。虜兵益衆。搏戰不已。文忠馬中流。

矢急下馬持短兵接戰從者劉義直奮擊以身蔽文忠
指揮李榮見事急以所乘馬援文忠自奪虜馬乘之文
忠策馬橫槊麾衆更進於是士卒鼓勇皆死戰虜遂敗
走獲人馬以萬計追至青海虜兵又集文忠勒兵據險
椎牛享士縱所獲馬畜于野示以閒暇居三日虜疑有
伏不敢逼乃遁去文忠亦引兵還夜行失故道至桑哥
兒麻士卒無水渴甚文忠默禱於天乘馬跑地長鳴泉
水湧出人皆以爲天助云

癸卯句容民獻嘉瓜二同蒂而生。

上御武樓中書省臣率百官以進禮部尚書陶凱奏曰
陛下臨御同蒂之瓜產於句容句容陛下祖鄉實爲

禎祥。益由聖德和同。國家協慶。故雙瓜連蒂之瑞。獨見於此。以彰陛下保民愛物之仁。非偶然者。上曰。草木之瑞。如嘉禾並蓮合歡。連理兩岐之麥。同蒂之瓜。皆是也。卿等以此歸德於朕。朕否德不敢當之。縱使朕有德。天必不以一物之禎祥示之。苟有微過。垂象以譴告。使我克謹其身。保民不致於禍殃。且草木之祥。生於其上。亦惟其土之人應之。於朕何預。若天地間時和歲豐。乃王者之禎。不在微物。遂爲贊賜民錢一千二百。作鐵榜申戒公侯。

甲辰。命工部造紅牌。鐫戒諭后妃之辭。懸於宮中。

七月乙未。左副將軍李文忠。以所獲故元官屬子孫及軍

士家屬一千八百四十餘人送至京師。

上謂都督府臣曰故元官屬子孫不宜與士爲伍。俾參隨指揮周龍有可用者量才用之。軍士則令舊校李伯顏不花領之以隸羽林衛。

壬戌命工部運文綺及綿戰襖詣大同以俟給賞大將軍徐達征北軍士。

庚午高麗王顥奉表言耽羅國不奉朝貢及多有蒙古人留居其國宜徙之并乞發兵討蘭透山遁逃。詔寢之。

八月丙子禮部尚書奏擬上親祀皇太子留居守親王戎服侍從皇太子親王雖不陪祀宜一體齋戒請著爲令從之。

已卯貴州宣慰使霽翠請討部落隴居。詔却之。

上以隴居反側不從命。由於霽翠所激。謂大都督府臣曰。蠻夷多詐。不足信也。中國之兵豈外夷報怨之具耶。宜遣使諭蠻中守將鎮守邊境。霽翠所請不從。將起邊釁。宜預防之。

乙酉太原府徐溝縣西北空中有聲如雷。

河南民獻白兔。命放之野。

丙申副征南將軍吳良等平五開潭溪古州諸蠻。

凡二百四十三洞。籍其民一萬五千。收集逃散士卒四千五百四十人。牛馬四百餘頭。

九月丁巳靖海侯吳禎遣送遼東故元平章高家奴知樞

密院高大方同僉高世舉張海馬遼陽路總管高賦等至京。

戊午。征南將軍周德興等討婪鳳安田等諸洞悉平之。遂克泗城州。

壬戌。聖壽節。詔勿賀。

諭高麗國。繼今聖壽節。千秋節。俱免慶賀禮。

十月。戊子。詔自今雜犯死罪可矜者。免死。發臨濠輸作。甲午。命中書省諭高麗。并占城安南等國。遵三年一聘之禮。或比年一來。所貢方物勿令過多。

上憫驛傳重繁。諭中書省臣。令馬夫必糧富丁多者。克役。有司務加存恤。有非禮擾害者。罪之。

蠲應天太平鎮江寧國廣德秋糧。

十一月壬子。定命婦團衫之制。以紅羅爲之。綉重雉爲等。第一品九等。二品八等。三品七等。四品六等。五品五等。六品四等。七品三等。其餘不用綉雉。

己巳。上以西安河蘭諸處極邊苦寒。戍卒艱苦。命中書省臣以白金及綿布給之。

軍士十萬餘人。凡給白金三十三萬四百餘兩。綿布十四萬七千七百餘疋。

辛未。上因靖海侯吳禎盡收遼東未附地土。以可懼諭之。

上曰。海外之地。悉歸版圖。固有可喜。亦有可懼。禎曰。陛

下威德加於四海。夫復何憂。上曰。自古人君之得天下。不在地之大小。而在德之修否。元之天下。地非不廣。及末主荒淫。國祚隨滅。由此觀之。不可懼乎。禎對曰。聖慮深遠。臣愚不及此。

壬申。命賞甘肅京衛軍士。

凡賞一萬四千三百五十人。白金四萬四千兩。時公侯都督指揮千百戶以匿所獲馬騾牛羊不賞。上曰。爲將者不私其身。況於物乎。昔祭遵爲將。憂國奉公。曹彬平南唐。所載惟圖書。汝等能法古人。則令名無窮。今之不賞。汝等當省躬以思補過。諸將皆叩頭謝罪而退。

十二月甲戌。勅中書令有司。今後考課。必書學校農桑之

績違者降罰。

己卯。上以堯舜執中之旨諭禮部侍郎曾魯。

上謂魯曰。朕求古帝王之治。莫盛於堯舜。然觀其授受。其要在允執厥中。後之儒者。講之非不精。及見諸行事。往往背馳。魯曰。堯舜以此道宰制萬事。如執權衡。物之輕重長短。自不能違。而皆得其當。此所以致雍熙之治也。後世鮮能體此道。於是處事之際。欲求其一一至當。難矣。上曰。人君一心。治化之本。存於中者。無堯舜之心。而欲施於政者。有堯舜之治。不可得也。魯又曰。堯舜之道。載之典謨者。無以加矣。至於修身理政。本末次第。具大學一書。上曰。大學。平治天下之本。豈可舍此而

他求哉。

庚辰。詔編實錄。

禮部尚書陶凱言。漢唐宋皆有會要。紀載時政。以資稽考。今起居注紀言紀事。藏之金匱。實爲實錄。凡諸欽錄聖旨。及奏事簿籍。紀載時政。可以垂法後世者。宜依會要編類爲書。使後之議事者有所考焉。其臺省府宜各置銅匱藏錄簿。以備稽考。俱從之。

乙未。詔別立四川茶局。

四川茶鹽都轉運司言。碯門永寧筠連諸處產茶。各剪粗葉。惟西番夷獠用之。自昔商販未嘗出境。旣非茶馬司巴茶之比。宜別立茶局徵其稅。易紅纓氊杉木布椒。

蠟可資國用。其居民所收之茶，亦宜依江南茶法。於所
在官司給引販賣。公私便之。今擬設永寧茶局一。曰戒
首鎮。歲收茶一十八萬八千斤。雅州茶局一。曰礪門。歲
收茶四十一萬一千六百斤。成都茶局三。曰灌州。歲收
茶七千四百三十斤。曰安州。歲收茶一萬三千一百七
十斤。曰筠連州。歲收茶二十九萬六千二百八十斤。旣
收，則徵其十一於官。詔從之。

庚子。詔造獨轅車。

徐達督山西河南造八百輛。李文忠督北平山東造一
千輛。

癸丑。洪武六年正月癸卯朔。

乙巳豫章侯胡廷美收集江州沔陽舊將士。

凡一萬四千五百餘人以舊校六十三人爲百戶分領之賜錢三千士卒人二千戰衣各一襲。

賜來朝守令酒食。

上諭之曰慈祥愷悌身之德也刻薄殘酷德之賊也君子成其德而去其賊故惠及於人小人養其賊而悖其德故殃流於衆且人莫不有是德君子守之不失故天理恒昭融於中小人舍而不爲故私欲恒蔽錮其內朕之任官所用惟賢舉廉興孝惟欲厚俗崇德勸善惟欲成風若僞爲慈祥必無仁愛之實僞爲愷悌必無樂易之誠爾等宜勉修厥德廣施惠政以副朕懷。

壬子。命吉安侯陸仲亨偕大同都督何文輝往北平練兵防禦。

甲寅。以舉人張唯王輝李瑞張翀王璉張奉任敬馬亮陳敏俱爲編修。令入文華堂肄業。詔太子贊善大夫宋濂爲之師。

上聽政之暇。輒幸堂中。取其文親定其優劣。命光祿日給酒饌。每食。皇太子親王。迭爲之主。冬夏賜衣。時賜白金弓矢鞍馬。寵遇甚厚。

黜中書右丞相汪廣洋爲廣東行省叅政。

時廣洋以巽柔怠政。黜之。

丙辰。命工部尚書黃肅以俸贖筇。

肅坐法當笞。上曰：六卿之職，不宜以細故加辱。命以俸贖之。

戊午，命中書省臣同大都督府御史臺六部議教練軍士律。

己未，置西寧衛。以故元納款朶兒只失給爲指揮僉事。

辛酉，上諭儒臣詹同戒聲色。

上曰：朕嘗思聲色乃伐性之斧斤，易以溺人。一有溺焉，則禍敗隨之。故其爲害甚於鴆毒。朕觀前代人君，以此敗亡者不少。蓋爲君居天下之尊，享四海之福，靡曼之色，窈窕之聲，何求而不得？苟不知遠之，則小人乘間納其淫邪，不爲迷惑者有幾？况創業垂統之君，爲子孫之

承式尤不可以不謹。同對曰：不邇聲色，昔成湯所以能垂裕後昆。陛下此言，端本澄源，誠萬世子孫之法也。詔免江西沮壞鹽法商民死輸作臨濠。安南陳叔明遣其臣譚應昂等奉表謝罪，貢方物，且請封爵。

應昂懇陳前王日熉因病而歿，叔明遜避于外，爲國人所立。上曰：熉旣病卒，國人當爲之服。叔明且以前王印視事，俟能安疆土，撫輯人民，然後定議。命中書下廣西行省備述斯意以諭之。

二月戊子，改羣牧監爲太僕寺，以監令唐原亨爲太僕寺卿，監丞孫瑛爲少卿。

始定養馬之法。命應天廬州鎮江鳳陽等府滁和州民養江北便水草一戶養馬一匹。江南民十一戶養馬一匹。官給舍馬爲種。率三牝馬置一牡馬。每一百匹爲一羣。羣設羣頭羣副掌之。牝馬歲騾馬一駒。牧飼不如法。缺駒損斃者責償之。其牧地擇旁近水草豐曠之地。春夏牧放游牝。秋冬而入寺官以時巡行羣牧。視馬肥瘠而勸懲之。任滿吏部考其生息多寡以爲殿最焉。

甲午暫停設科舉。別令有司察舉賢才。

三月癸卯。昭鑑錄成。

先是命禮部尚書陶凱主事張籌等采摭漢唐以來藩王善惡可爲觀戒者爲書。會凱出叅行省。編輯未成。於

是召秦王傳文原吉翰林院編修王傑國子博士李叔
允助教朱復秦府錄事蔣子杰續修之。至是書成。繕寫
爲二卷。太子贊善大夫宋濂爲叙以進。賜名曰昭鑑錄。
以頒賜諸王。

戊申。上閱武教場。畢諭諸將毋凌虐害民。

壬子。命魏國公徐達爲征虜大將軍。曹國公李文忠爲左
副將軍。中山侯湯和爲右副將軍。統諸將校往山西北平
等處備邊。

甲寅。命德慶侯廖永忠督定遼糧儲。仍以戰衣皮鞭各二
萬五千給其軍。

庚午。詔會計在京大軍月糧官吏俸給。

月支二十五萬五千六百六十石有奇。

四月壬申。太僕寺丞梁埜先帖木兒請寧夏境內務農屯田兼行種鹽之法從之。

境內及四川西南至船城東北至塔灘相去八百里土田膏沃舟楫通行宜招集流亡與此利以足軍食。

戊子以孔克表爲翰林修撰。

己丑命天下郡縣繪山川圖以進。

戊戌置御藥局于內府。

辛丑命吏部訪求天下賢才。

上曰世有賢才國之寶也古之聖王恒汲汲於求賢若高宗之於傳說文王之於呂尚二君者豈其智之不足

也。而遑遑於版築鼓刀之徒，蓋賢才不備，不足以爲治。鴻鵠之能遠舉者，爲其有羽翼也；蛟龍之能騰躍者，爲其有鱗鬣也。人君之能致治者，爲其有賢人而爲之輔也。今山林之士，豈無德行文藝之有稱者？宜令有司采舉，備禮遣送，至京。朕將任用之，以圖至治。

淮安侯華雲龍奏上諸關防守事宜，從之。

東自永平薊州密雲，西至五灰嶺外隘口，通一百二十一處，相去約二千二百里。其王平口至官坐嶺關隘，有九約去五百餘里，俱係衝要之地，並宜設兵守之。紫荆關及蘆花山嶺，尤爲要路，宜設千戶所禦守。

五月壬午，祖訓錄成。

其目十有三曰箴戒曰持守曰嚴祭祀曰嚴出入曰慎國政曰禮儀曰法令曰內官曰職制曰兵衛曰營繕曰供用。上親爲之序。首尾六年。凡七謄稿。始克成編。於是頒賜諸王。且錄於謹身殿東廡。乾清宮東壁。令諸王書於王官正殿內東宮壁。以時觀省。

詔定公侯以下家廟禮儀。

六月壬午。旰旰縣民進瑞麥一莖二穗者。凡十六本。

御史答錄與權言。天產嘉祥。皆所以兆國家之福。而爲聖世之徵。今瑞麥之產。乃上帝借草木之靈。以彰君臣異體同心之象。又產於旰旰。屬臨濠帝鄉也。是宜薦之宗廟。以彰祖宗之神靈。且新麥之登。尚薦宗廟。况瑞麥

乎。上曰：以瑞麥爲朕所致，則不敢當。必歸之祖宗神靈。御史之言良是。乃命薦之宗廟。

甲申，胡兵入寇武朔等州。時大將軍徐達駐師臨清，報至，遣臨江侯陳德、鞏昌侯郭子興率兵進擊之。

戊寅，命淮安侯華雲、龍都督同知何文輝以永平起集故元舊五省八翼軍士一千六百六十二人分補北平各衛軍伍。

戊子，大將軍魏國公徐達分遣左副將軍李文忠率諸將統騎兵，右副將軍馮勝率諸將統步兵，分駐山西北平等處，相機招討殘胡。

七月壬子，以中書左丞相胡惟庸爲右丞相，御史中丞陳

寧爲御史大夫。

丙辰以吏部尚書詹同等爲翰林學士承旨。仍兼吏部尚書。以兵部尚書樂韶鳳爲翰林侍講學士。

己未詔禮部每春正月秋七月享太廟之日遣官祭功臣於雞鳴山廟。

八月庚午學士承旨詹同等上所制釋奠先師孔子樂章。迎神奏咸和之曲。奠帛奏寧和之曲。初獻奏安和之曲。亞獻終獻奏景和之曲。徹饌送神俱奏咸和之曲。

丙子胡兵寇河州土門峽千戶王才戰死臨江侯陳德統兵擊敗之。

丁丑遣御史大夫陳寧釋奠於先師孔子。

時丞相胡惟庸奏誠意伯劉基叅政馮冕等不陪祭而受胙。上曰劉基等學聖人之道而不陪祀使弗學者何以勸。旣不與祭而享其胙於禮可乎。其武人不知道理皆不足責。命停基冕俸各一月。寧坐不舉亦停俸半月。自是不與祭不頒胙。

辛巳更定親屬相容隱律。

乙酉建歷代帝王廟於京師。

祀伏羲神農黃帝少昊顓頊高辛唐堯虞舜夏禹商湯周文王武王漢高祖光武唐高祖太宗宋太祖元世祖襲封衍聖公孔希學以父喪服闋來朝勅勞之。

勅曰卿家昭名歷代富貴不絕者乃由陰騭之重耳何

者以其闡聖學之精微明彛倫之攸叙表萬世綱常而
不泯也朕嘗思爾祖之道貫通天人則所以繩祖武者
誠爲不易朕聞卿來朝已勅中書饗勞至則領之仍賜
襲衣冠帶靴鞋。

己丑京都城成。

週圍二千六百丈高三丈城上戍屋二百七十九。

九月壬寅詔編日曆。

承旨詹同等奏自上起兵渡江以來征討平定之績

禮樂治道之詳雖有紀載而未成書乞編日曆歲之金

匱傳於後世上從其請命同與侍講學士宋濂爲總

裁官侍講學士樂韶鳳爲催纂官禮部員外郎吳伯宗

儒士朱右趙壘徐一夔孫祚徐尊生同纂修鄉貢進士黃景國子監生陳益賜等謄寫。

丁卯詔定散官資級文武官誥勅制度。

公侯一品至五品誥命六品至九品勅命公侯及一品誥命用玉伯子男及二品以下用犀五品以下用角。

丁未衍聖公孔希學請歸。賜白金百兩文綺帛各五疋。賜宴於光祿寺命翰林院官待之。

庚戌詔禁四六文辭。

先是命翰林院儒臣擇唐宋名儒表箋可爲法者翰林諸臣以柳宗元代柳公綽謝表及韓愈賀雨表進。上命中書省臣錄二表頒爲天下式諭羣臣曰唐虞三代

典謨訓誥之辭質實不華。誠可爲千萬世法。漢魏之間。猶爲近古。晉宋以降。文體日衰。駢驪綺靡。而古法蕩然矣。唐宋之時。名儒輩出。雖欲一變。而卒未能盡變。近代制詔表章之類。仍蹈舊習。朕嘗厭其雕琢。殊異古體。且使事實爲浮文所蔽。其自今凡誥諭臣下。辭務簡古。以革弊習。爾中書宜播告中外。臣民凡奏箋奏疏表文。毋用四六對偶。悉從典雅。

戊午。鑄太和鐘成。

壬戌。改臨濠府爲中立府。

十月。辛未。賜弘文館學士胡鉉還鄉。

辛丑。却高麗貢馬。賜璽書責之。

書云王之貢馬其數五十匹。使云道亡者二。而至京如數。乃金甲丙以已馬足之。詢之云欲自進於東宮。因道亡。遂以備數。命使問之。果王言乎。抑汝意乎。對曰。非王自願也。春秋之法。人臣無私交。使越風濤之險。以奉貢獻。而又挾私以行詐。此果以小事大之禮乎。若使者自爲宜懲治之。

壬辰。令考究前代糾劾內官法。

丁酉。江夏侯周德興奏。田州府總管黃至威招撫鳳儀等州一百一十七處。人民皆來款附。上嘉至威招撫之功。以安州侯州陽縣屬之。

十一月。壬子。大將軍徐達等擊胡兵於懷柔三角村。擒故

元平章康同僉。

已未。潞州遣人貢人參。

上諭之曰。朕聞人參得之甚難。豈不勞民。今後不用進。如用。當遣人自取。因謂省臣曰。往年金華貢香米來。朕用止之。遂以苑中種田數十畝。每耕耔刈穫之際。親往觀之。足以自適。及計所入。亦足供用。朕飲酒不多。太原歲進葡萄酒。自今亦令勿進。國家以養民爲務。豈宜口腹累人哉。嘗聞宋太祖家法。子孫不得遠方取珍味。甚得詒謀之道也。

閏十一月甲申。詔定品官家用祭服公服。

禮臣定議。品官之見尊長而用朝君公服。於理未安。宜

別製梁冠絳衣絳裳革帶大帶大白襪烏舄佩綬其衣裳去緣僕三品以上用佩綬三品以下不用其祭服三品以上去方心曲領三品以下并去佩綬從之仍令如式製祭服賜公侯各一襲以爲祭家廟之用。
已丑詔詳定大明律。

先是上旣命頒行律令又恐小民不能周知命大理卿周禎等直解其意頒行民間旣而又令儒臣同刑官共講唐律目錄二十餘條進覽上爲斟酌擇其可行者從之至是重命劉惟謙詳定大明律篇目皆准于唐十二月戊戌併僧道寺觀禁女子不得爲尼。

上以釋老二教近代崇尚太過徒衆日盛安坐而食蠹

財耗民身甚於此。乃令府州縣止存大寺觀一所。併其
徒而處之。擇有戒行者領其事。若請給度牒。必考試通
經典者方許。又以民家多以子女爲尼。姑女冠。自今年
四十以上者聽。未及者不許。著爲令。